

2 Coodintoidi inänite Pabodo cadota ante ayänta nänö yewämongainta

Waa quëwencæminimpa, ante

1 ¹Wængonguï pönö angä beyä Itota Codito botö Pabodobo imote da godongä godongaïmo inte botö mönö töninacä Tïmoteo tönö guëa apænemöna ate botö iïmaï ante yewämömopa. Coodinto iñömö quëwëmini inte mïnitö iñömö Codito ingante mïni godongämæ pönencabo incæ acæminimpa, ante yewämömopa. Ayä Acayabæ tömäo iñömö quëwente Wængonguï quïnäni inte tömënäni adobaï adota acædanimpa, ante yewämömopa. ²Mönö Awënë Itota Codito tönö Mæmpo Wængonguï tönö guëa waadete pönö cæda adinque mïnitö gänë pönente waa quëwencæminimpa, ämönapa, ante yewämömopa.

**Codito iïmaï waadete
pönö cæcampa, ante**

³Mönö Awënë Itota Codito Wæmpocä iñongante Itota iñömö adocä ingante, Botö Wængonguï inongä ingampa. Ayä Itota Wængonguï adocä inongä inte tömengä mönö wæwënö ante adinque godongämæ wæte baï pönö waadete apænecä ëñëninque mönö wampo pönëmö imopa. Mänömaï beyä, Itota Mæmpo Wængonguï cöwë waa cæcampa, ante mönö watapæ apænecæimpa. ⁴Adocä Wængonguï mönö imonte äninque, Wënæ wënæ wæwëmini adinque botö waadete pönö apænebo ëñëninque mïnitö wampo pönëmïnitapa. Ininque wadäni wënæ wënæ wæwënäni adinque mïnitö botö apænedö ante waadete godö apænemïni

ëñëninque tömënäni wæætë wampo pönencædanimpa, ante botö mïnitö iminite pönö cætabopa, Wængonguï angampa.

⁵Edæ iïmaï beyä mänömaï angampa. Codito në nantate wægaingä beyä nantate wæwëninque mönö tömengä tönö äanque baï nantate wæwëmopa. Ayä adobaï nantate wæwëmö adinque adocä Codito waadete pönö apænecä ëñëninque mönö tömengä tönö äanque baï ëwocadinque wampo pönëmopa. ⁶Mönitö nantate wæwëmöni amïnitawo. Edæ mönitö nantate wæwente apænemöni beyä Wængonguï mïnitö iminite wæætë pönö waadete apænecampa. Apænecä ëñëninque mïnitö wæætë wampo pönëninque wænämaï quëwencæminimpa, ante Wængonguï cæcampa. Ayä mönitö wæwëñömönite tömengä pönö waadete apænecä ëñente wampo pönëmöni amïnitawo. Edæ mïnitö nantate wæwëmini inte wampo pönencæminimpa, ante Wængonguï mänömaï cæcampa. Ayä wampo pönëmïni badinque mïnitö iincayä ate mönitö nantate wæwënö baï adobaï nantate wæwëmini incæte piyänë cæte ee cæte quëwencæminimpa, ante Wængonguï pönö cæcampa. ⁷Ayä mönitö tönö äanque baï mïnitö nantate wæwëmïnitawo. Edæ tömengä waadete pönö apænecä ëñëmïni ate mïnitö adobaï mönitö tönö äanque baï wampo pönënguimïni imïnipa. Ante do ëñëninque mönitö, Nawangä mïnitö watapæ quëwencæminimpa, ante do pönëmönipa.

⁸Īñānāni, mōnitō Atiabæ quēwēninque æbānō wēnæ wēnæ bate wætamōnii, ante ñōwo yewæmōmo aedāni. Tæi piñæmōni ināmaī inte mōnitō godōmenque teēmē mongænte baī nanguī wēnæ wēnæ bate wædinque, Nangæ bate wænguī wæ, ante wætamōnipa. ⁹Wængonguī do angā wænguēnēmōni imōnipa, ante nāmāneque pōnente wætamōnipa. Incæte mōnitō, Tōmēmōni nāmā tæi piñænō beyænque quēwencāmōnipa, ante pōnēnāmaī incēmōnipa, ante odōmōncæte ante Wængonguī pōnō cæcā wætamōnipa. Wæætē tōmengā, Do wængaiñāni quēwencādānimpā, ante botō nē āmo iñōmote mīnitō wæætē botō imote wede pōnente quēwencāmīnimpā, ante cæcæte ante Wængonguī mǎnōmaī pōnō cæcā wætamōnipa. ¹⁰Mōnitō mǎninō mōni oo wænguīnque ante wæyōmōnite tōmengā do bæi ongonte ængā beyænque quēwentamōnipa. Ayæ ate wæyōmōnite tōmengā ængā beyænque quēwencāmōnipa. Ayæ, Adocā wæætē wæætē ængā beyænque quēwencāmōnipa, ante pōnēninque mōnitō tōmengā ingante wede pōnente tomōnipa. ¹¹Īnīnque mīnitō iñacabo gongænte baī mōnitō beyæ Wængonguī ingante apænemīni ēñēninque tōmengā cōwē bæi ongonte ængā beyænque quēwencāmōnipa. Mǎnōmaī cæcā adīnque nanguī ināni wæætē Wængonguī ingante waa ate pōnente iīmaī ante apænecedānimpā. Wængonguī ēñēmi. Nanguī ināni apænedāni ēñēninque bitō Pabodoidi beyæ pōnō waa cæbi amōnipa, ante apænequīnāni inānipa.

Coodinto iñōmō quīnante pōnāmaī imoi, Pabodo angampa

¹²Mōnitō iīmaī ante nāmā waa ate pōnēninque apænemōnipa. Wængonguī quīmōni inōmōni inte mōnitō tōmengā, Tæiyæ waēmō ewocacāmīnimpā, ante ænte entawēmōnipa. Mǎnōmaī beyæ Wængonguī nō cæcā baī mōnitō adobaī inguipoga quēwēninque nō

cæte quēwēmōnipa. Ayæ mīnitō weca pōninque mōnitō godōmenque waa cætāmōnipa. Mǎnōmaī cædinque mōnitō inguipoga quēwēnānique nāni ēñēnō beyænque dicæ cætāmōniyaa. Wæætē mīmō entawēmōni inte nāmā apænte āninque mōnitō Wængonguī waadete pōnō apænecā ēñēninque eyepæ cætāmōnipa, ante tomōnipa. ¹³Mīnitō acāmīnimpā, ante yewæmōninque mōnitō dicæ idiquibæ ante yewæmōmōniyaa. Wæætē, Edonque adīnque do ēñencāmīnimpā, ante edonque yewæmōmōni abaimīnimpā. Ayæ botō, Mīnitō nāwangā godōmenque ēñencāmīnimpā, ante iīmaī ante pōnēmopa. ¹⁴Mōnitō æbānō imōnii, ante mīnitō pancaā ante do ēñēmīnimpā. Ayæ, Mōnō Awēnē Itota tōmengā nānō ponguīōnæ iīnque bayonte mōnitō mīnitō imīnite adīnque, Mīnitō nē wede pōnengāimīni imīnimpā, ante adīnque tocāmōnimpā, ante do ēñēmīnitawo. Ayæ mǎniōnæ bayonte mōnitō imōnite adīnque mīnitō adobaī, Waa nē cægaīmīni imīnimpā, ante tocāmīnimpā, ante āmo ēñēmaimīnimpā.

¹⁵Mǎnōmaī impā, ante pōnēninque botō, iīmaī cæcæboimpā, ante pōnentabopa. Wayōmō ayæ godāmaī inte botō tāno mīnitō weca ponte waadete apænecæboimpā. Apænēbo ēñēninque mīnitō wæætē mempoga tocāmīnimpā, ante iīmaī cædīmo intabopa. ¹⁶Mīnitō weca tāno ponte ēñadinque godōmenque godīnque botō Mǎatedōniabæ gote pōninque wæætē mīnitō weca adodō ocā ēmænte poncæ cædīmo intabopa. Ayæ pōmo ate mīnitō botō imote godongāmæ cædinque da godōmīni godōmenque Oodeabæ gocæ cædīmo intabopa. ¹⁷Incæte botō, Mǎnōmaī cæquīmo imopa, ante pōnēninque dicæ ōnonque ante pōnentawogaa. Mǎnōmaī pōinēmo inte botō ñimpō cæte pōnāmaī imo adīnque mīnitō, Pabodo æmæ pōnente, Wīi pōinente wabānō wīi pongā, ante pōnēmīnitawo. Īñæmpa inguipogaque quēwēnāni mǎnōmaīnō ante nāni æmæ

pönönö bai botö iñömö edæ dicæ adobaï pönentawogaa.

¹⁸Wængongui näwangä mönō imonte cōwē pönēninque nē aacā ingampa, ante nō pōnī impa. Mänōmainō ante nō pōnī ī bai mīnitō imīnite mōnitō apānedō iñömō adobaï nō pōnī impa. Īninque mōnitō ædō cæte wadō ante apānequimōnii. ¹⁹Tidibānō tōnō Timoteo botō tōnō mīnitō weca pōninque, Wængongui Wengä Itota Codito ingampa, ante nō impa, ante apānemōni ēñēmīnitawo. Īninque mōnitō Itota Codito nempo quēwēninque nē Ao ämöni inte ædō cæte ämæ pōnente bai wadō ante apānequimōnii.

²⁰Īmaï impa. Wængongui, Cōwē cæcæboimpa, ante æpogamē wæætē wæætē angacäimpa. Wæætē wæætē angä incæte Codito iñömō edæ cōwē Ao äninque, Wængongui nänō angainō tōmānō iinque cæcæimpa, ante cæcampa. Īninque mōnitō tōmengä tōnō cædinque, Wængongui nāō apāite bai ēmōñongante tōmānāni tōmengä ingante waa acädänimpa, ante cædinque, Ao, mänōmaï impa, ante, Amëë, ante watapæ apānemōnīpa. ²¹Wængongui incæ mōnitō imōnite apænte æninque ayæ mīnitō imīnite apænte æninque, Mīnitō Codito nempo quēwēninque nē tæï piñämīni bacæmīnimpa, ante mōnō tōmāmō imonte pōnō òni pæte bai cædinque iïmaï cæcampa. ²²Tōmengä ēmōwo yewæmōnte bai cædinque, Botō quimīni imīnīpa, ante pōnō cæcampa. Ayæ, Īncayæ ate mīni godōmenque nanguï ænguinque mīnitō nōwo botō Ōnōwoca ingante ænte ēwocaedāni, ante tōmengä Ōnōwoca ingante nōwo da pōnongä ænte ēwocamīnīpa.

²³Īninque Coodinto iñömō botō quīnante wæætē pōnāmaï ingaboï. Edæ wēnæ wēnæ cæmīni adinque mīnitō imīnite nē panguēnēmo incæ botō, Wīi pāinente awædō, ante wīi pontabopa. Wængongui ayongante botō, Mänōmaï impa, ante nō apānebo ēñēmaimīnīpa. ²⁴Īmaï ante wede pōnencæmīnīpa, ante mōnitō dicæ

nē wææ ämöni imōniyaa. Wæætē edæ, Mīnitō mīni wede pönönö beyæñque tæï ongōninque edæ nanguï cæmīnīpa, ante adinque mōnitō wæætē, Mīnitō watapæ tocæmīnīpa, ante cædinque mīnitō tōnō godongāmæ cæmōnīpa.

2 ¹Botō wēñēñedē mīnitō weca ēñacæ pōninque nanguï ämo wæmīnitapa. Īninque, Wīi wæætē ämo wæcæmīnīpa, ante nōwo ēñacæ pōnāmaï incæboimpa, ante nāmāneque pōnēninque antabopa. ²Edæ pīmo wæwēmīni bai æcänō wæætē, Tocæbiimpa, ante botō imote waadete pōnente apānequēnengä. Īñæmpa botō pīmo beyæ nē wæwēnimīnique ongōmīni bai botō imote nē waadete pōnente apānequēnengä iñömō edæ dæ ancædongäimpa. ³Botō quīēmē beyæ tobo adinque mīnitō godongāmæ watapæ toquēnēmīni imīnīpa, ante pōnentabopa. Mīnitō botō beyæ äninque, Pabodo mōnō weca pongä adinque mōnō cæmō tocæcäimpa, ante nē cæquēnēmīni imīnīpa, ante awædō. Īninque, Mīnitō weca pōninque botō mīnitō wæwēnō ante wædāmaï incæboimpa, ante cædinque botō, Botō cadota ante yewæmōmo adinque mīnitō ēñente cæcæmīnīpa, ante wæbopa. ⁴Botō nanguï caate wædōmo inte mīmōnoque pōnente wæwēninque yabæque adobaï Ca ca nanguï pōnente wædinque mänōmainō ante wæbopa. Incæte botō, Mīnitō wæwencæmīnīpa, ante dicæ ämogaa. Wæætē, Botō æbänō mīnitō imīnite nanguï waadete pōnēmopa, ante ēñencæmīnīpa, ante odōmoncæte ante yewæmōmopa.

**Nē wīwa cæcä ingante æbänō
godō waadete nīmpo cæquīi**

⁵Adocanque wīwa cæcä adinque botō tōmengä nänō wīwa cædō beyæ wæwēmo incæte mīnitō tōmāmīni wædænque incæ nanguï incæ wæwēmīni adobaï imīnīpa. Botō, Tōmengä ingante piñāmaï incæboimpa, ante pōnēninque, Wædænque wæwēmīnīpa, ante apānebopa. ⁶Nē ēñēnāmaï cædingä

ingante mīnitō pancamīniya wodo tōmāmīni do pāmīnitapa. Īnīnque botō, Idæwaa pāmīnīpa, āmopa. ⁷Tōmēngā, Ancaa pāmīni awædō, ante godōmenque wæwente bacantawo. Īnīnque mīnitō pōnō nīmpo cædinque tōmēngā ingante, Idæwaa pāmōni wæbīpa, ante ædæmō waadete apænemīni ēñēnīnque tōmēngā īnīnque wædinque wampo pōnencæcāīmpa. ⁸Mīnitō wæætē, Bitō īmite nāwangā waadete pōnēmōnīpa, ante adodō apænemīni ēñencæcāīmpa, ante botō mīnitō īmīnite nanguī āmopa. ⁹Botō ānō ante æbānō tōmānō ante ēñēnte cæmīnī, ante ēñēncæte ante botō wēēnēñedē yewæmontabopa. Eyepæ cæmīni ate wædinque botō, Eyepæ cæmīnīpa, āmopa. ¹⁰Nē ēñēnāmaī cæcā ingante mīnitō nīmpo cæmīni ee gocantawo. Mānōmaī cæmīni īnīnque botō nōwo adobaī nīmpo cæbopa. Waocā æcāmenque ēñēnāmaī cæcā adīnque godō pōnō nīmpo cæbo īnīnque botō Codito ayongante mīnitō beyænque ante mānōmaī godō nīmpo cæbo intabopa. ¹¹Īñæmpa Tatāna incæ angā ēñēnte beyænque mōnō oda cæte wæquinque edæ godōmenque pīīmaīmōmpa, ante aquēnē quēwēedāni. Tatāna æbānō, Oda cæte wæcædānīmpa, ante cæcampa, ante edæ do ēñēmōmpa.

Tito beyæ ante Pabodo wæcampa

¹²Botō Todoa nāni quēwēñōmō tāno pōnīnque, Mōnō Codito ingantedō ante watapæ apænecæte ante cæyōmo mōnō Awēnē, Botō beyæ guīte apænee, ante odemō wī ænete baī do cæcā atabopa. ¹³Incæte botō tōnīñacā Tito dæ angā wædinque botō, Ædō cæte īñōmō a ongonte apænequīmoo, ante tōmēnāni īnānite, Gobopa, ante Māatedōniabæ gocæte ante wadæ gotabopa.

Codito nempo quēwēnīnque tæī ēmōmōnīpa, ante

¹⁴Nē tæī ēmōngā inte mōnō Codito īñōmō nē pīīnte cædāni īnānite gānā cæcampa. Īnīnque mōnitō Codito nempo quēwēñōmōnīte Wængonguī, Nē tæī

ēmōngā ingante waa acædānīmpa, ante cædinque mōnitō īmōnīte nē tæī ēmōngā mīñæ ænte māocā dao dao godīnque mōnitō tōmēngā nānō ēmōnō baī adobaī tæī ēmōmōnīpa. Ayæ oguī wa woboyæ wodo wodo cædinque tōmāo māo oguī wa baī Wængonguī adobaī cædinque mōnitō īmōnīte angā ēñēnīnque mōnitō wæætē, Mōnō Codito æbānō ingāā, ante wayōmō wayōmō māo apænemōni ēñēnānīpa. Wængonguī mānōmaī cæcā beyæ mōnō Wængonguī ingante waa ate pōnēnīnque apænecæīmpa.

¹⁵Īīmaī edæ īmpa. Codito ængā beyænque nē quēwēnguināni weca quēwēmōni incæ nē wænguināni weca quēwēmōni incæ mōnitō Codito nempo quēwēnīnque tōmēngā nānō oguī wamōnedō baī mōnitō adobaī, Wængonguī wē ongonte baī tocæcāīmpa, ante oguī wamōnete baī apænemōnīpa. ¹⁶Mōnitō oō wa wamōnete baī cædinque nē wænguināni īnānite tōmēnāni nāni wænguīmāmo ante apænemōni ēñēnīnque tōmēnāni nāni wænguinque wē ongonte ocado cæte baī ēñēnānīpa. Wæætē oguī wamōnete baī mōnitō nē quēwēnguināni īnānite guiquēnē tōmēnāni nāni quēwēnguīmāmo ante apænemōni ēñēnīnque tōmēnāni wæætē nāni quēwēnguinque wē ongonte ocado cæte baī ēñēnānīpa.

Īnīnque mānīnō mōnitō cæquēnēnō ante æcānō eyepæ cæquingāā. ¹⁷Edæ nanguī īnāni nāmā beyænque ante æncæte ante cædinque Wængonguī nānō apænedō ante apænewēnāni baī mōnitō wīī adobaī wēnæ wēnæ cæcæte ante apænemōni īmōnīpa. Wæætē Wængonguī mōnitō īmōnīte da godongā godīnque māo nē apænemōni inte mōnitō Wængonguī ayongā mōnō Codito nempo quēwēnīnque nō pōnente apænemōnīpa.

Wængonguī mīīne pōnō angā beyænque quēwēmōmpa

3 ¹Mōnitō īmōnītedō ante pōnēnīnque mīnitō, Pabodoidi, Waa cæmōni ædāni, ante tedewēnānīpa,

ante wëenënedë ämînitawo. Ayä, Ñowo wæætë adodö ante tedewënänipa, ante pîimînitawo. Mönitö iñämpa nämanque ante, Waa cämöni aedäni, ante dicæ ämönïyaa. Wadäni mönitö imönite waa acädänimpa, ante cædinque pancadänïya guiquënë mînitö imînite äninque, Cadota ante pönö yewämöedäni, änäni ëñëninque yewämöminî ate tömënäni ænte mäo odömönäni adänipa. Ayä wadäni inänite adobaï, Cadota, änäni ëñente yewämönäni æninque mînitö imînite odömönänipa. Mönitö guiquënë, Cadota ante pönö yewämöedäni, ante dicæ ämönïyaa. ²Wæætë mînitö guiquënë waa quëwëmîni adinque wadäni, Pabodoidi tömënäni inänite apænedäni beyænque coodintoidi wede pönënanî inte waa quëwënäni amönipa, ante pönëninque cadota ate bai do ëñënanîpa. Mänömaï pönö cämîni æninque mönitö cadota näænte odömonte bai cædinque, Coodintoidi æbänö waa cädänii, ante tömänäni inänite odömöni adinque ëñënanîpa. ³Îninque, Pabodoidi apænedäni beyænque waa cädänipa, ante edonque acädänimpa, ante cædinque Codito iñömö Wængonguï nê Quëwengä Önowoca ingante da pönongä ænte ëwocamînipa. Mänömaï cædinque Codito cadota ante yewämönte bai pönö cædinque wiï tömengonca yewämongampa. Wiï dicaboga yewämöninque tömengä Önowoca ingante mînitö baonga da pönongä ænte ëwocamînipa.

⁴Codito godongämæ cæcä beyænque mönitö Wængonguï ayongä nöingä ante apænemönipa, ante pönëninque mönitö guïñenedämaï inte do edæ apænemönipa. ⁵Mönitö nämanque ante, Æbänö waa cämönii, ante eyepæ imönipa diyæ apænte anguimönii. Wæætë Wængonguinque pönö godongämæ cæcä ate mönitö eyepæ badinque cämönipa. ⁶Wængonguï, Botö pönö cæbo ate mînitö Ao ämîni îninque mönö godongämæ waa cæte quëwengæïmpa, ante cöwë

angampa. Tömengä doyedë iñömö, Botö wææ angainö ante ëñente cædinque quëwencæminimpa, ante nänö wææ angaine ante ñowo wæætë änämaï ingampa. Mänine ante ñowo ganca wææ angä bai mönö wænguinque incädönimpa. Ñowo guiquënë Wængonguï wæætë, Botö Önowoca ingante ænte ëwocadinque quëwencæminimpa, ante miïne ante apænecä ëñëninque mönö quëwenguinque Wængonguï Önowoca ingante ænte ëwocamöpa edæ. Mönitö iñömö tömengä Önowoca ingante nê ëwocamöni inte eyepæ badinque miïne Wængonguï ñowo nänö pönö apænede ante nê apænemöni imönipa.

⁷Wængonguï, Îimaï cæedäni, ante dicaboga wææ yewämongä ate mönö ëñënamäi imö beyænque mänine tömengä nänö wææ yewämongaine beyænque mönö wænguimämo bagatimpa. Incæte mänine beyæ edæ ñäö nanguï apäigatimpa. Îninque mänine ænte godömenque wææ äninque Möitee wodi awinca ñäö apäite bai ëmongacäïmpa. Mänii ñäö wodëmämö ëmongä incæte idægoidi tömengä awinca adinque, Ædö cæte Möitee awinca cöwä aquimönii, ante wægadänimpa.

⁸Mönitö guiquënë, Wængonguï Önowoca ingante ænte mönö quëwengæïmpa, ante möni apænedö beyænque quïëmë bai godömenque nanguï apäite bai apäicæïmpa. ⁹Mönö apænte tente wænguinque edæ mänine pedæne ante ëñënamäi cægamöïmpa. Incæte mänine ante nänö wææ angainö beyænque Möitee wodi awinca ñäö apäite bai ëmongacäïmpa. Îninque ñowo iñömö, Mönö nö cæte quëwenguinque ante Wængonguï Önowoca ingante ængæïmpa, ante möni apænedö guiquënë ñäö quïëmë bai godömenque nanguï näwante bai ënepa. ¹⁰Wængonguï Tæiyæ Waëmö Önowoca ingante ante möni apænedö iñömö godömenque ñäö nänö apäidö beyænque Möitee wodi nänö wææ angainö

guiquënë pönömenque apäidique edæ wodëmää badinque edæ dæ bapa. ¹¹Edæ mänine mönō wodëmää baquënëmāmo incæ ñāō apāite bai iñonte Möitee wodi ænte apænecacäimpa. Wængongui ñōwo nānō pönō āne guiquënë cōwē wodëmää badāmaī ēne inte godōmenque nanguī guīnæ nāwante bai ēnepa.

¹²Īnīnque, Wængongui Tāiyæ Waēmō Ōnōwoca pönō cæcā beyænque mönō nō cæte watapæ quēwengæimpa, ante pönente quēwēmōni inte mōnitō guīñenedāmaī inte do apænemōnipa.

¹³Möitee wodi guiquënë, Ñāō apāi bai botō ēmōnō incæ wodëmää bamōñōmote idægoidi adāmaī incädänimpa, ante cædīnque weocoo ñāne cæmongacäimpa. Mōnitō guiquënë Möitee wodi nānō ñāne cæmongaī bai cædāmaī ĩmōni inte edonque apænemōnipa. ¹⁴Māninta, Botō wææ angainō ante ēñente cædīnque quēwencæminimpa, ante Wængongui nānō pedænta ante adīnque idægoidi do nāni ñāne cæmongaincōo ñōwo ganca edæ ñāne cæmonte bai ēmōnānipa. Īnīnque tōmēnāni ocāi ōmæcadāni bai bagadänimpa. Edæ Codito nempo quēwēnānique mānincoo wi cæmonte bai ēmōnāni inte tōmēnānique edonque adāni ĩnānipa. Īnīnque idægoidi wæætē Codito nempo quēwēnāmaī ĩnāni inte ayæ edæ wi cæmōnāmaī inte wædānipa. ¹⁵Īnīnque idægoidi ñōwo ganca mimō bee otawente bai ĩnōnāni inte Möitee wodi nānō yewæmongainta adīnque ēñēnāmaī ĩnānipa.

¹⁶Incæte Awënë gāmēnō æcānō pōna tōmēngā Möitee wodi nānō wi cæmōnō bai badinque do wi cætawente bai bacampa. ¹⁷Mōnō Awënë incæ Wængongui Ōnōwoca ingampa. Ayæ waocā mönō Awënë Ōnōwoca ingante ēwocacā ĩnīnque tōmēngā wi cætawente bai entawente quēwēnōngā inte wīi tee mönete wæcā bai ingampa. ¹⁸Mōnō tōmāmō ĩñōmō awinca wi cæmonte bai ēmōnōmō inte mönō awocawænta bai bamōmpa. Īnīnque wadāni mönō ĩmonte adīnque, Mōnō Awënë æbānō ñāō apāite bai ēmōngāā, ante awocawænta ate bai

edonque acädänimpa. Ayæ godōmenque ayæ godōmenque mönō ñāō apāidō mönō ēwocāquinque mönō Awënë nānō ēwocadō bai mönō ayæ godōmenque ayæ godōmenque ēwocāmō ĩmōmpa. Mönō Awënë incæ Wængongui Ōnōwoca ĩnōngā inte mānōmaī pönō cæcā entawēmōmpa.

4 ¹Wængongui, Botō pönō cægainō ante mīnitō nē apænemīni incæminimpa, ante waadete pönō angā beyænque mōnitō māñinō ante nē apænemōni bagaimōni inte ñōwo wæ guēmōnāmaī inte cōwē apænemōnipa. ²Wadāni guiquënë tōmēnāni nāni guingo ĩmonte wæquinque awēmō cædānipa. Mōnitō ĩñōmō tōmēnāni nāni cæwēnō bai cædāmaī incæmōnimpa, ante do ānimōni inte babæ cædāmaī ĩmōnipa. Wængongui nānō apænedō ante idiquibæ apænedāmaī ĩmōnipa. Wæætē Wængongui ayōngā mōnitō tōmēngā nō nānō apænecānō ante edonque pōni odōmonte apænemōni ēñēnīnque tōmānāni mimō entawēnāni ĩnīnque edæ, Pabodoidi nō ante cædānipa, ante apænebaīnānipa.

³Incæte mönō Codito ingantedō ante watapæ mōni apænedō ĩñōmō ñāne cædete bai intawo. ĩñæmpa ñāne cædete bai ĩ ĩnīnque nē wē womonte wænguīnāni beyænque ñāne cædete bai ĩmpa. ⁴Wængongui nānō ēmōnō nē ēmōnōngā inte mönō Codito ĩñōmō mönō beyæ ñāō apāite bai cæcampa, ante watapæ mönō ēñente pōñēnō ante apænemōnipa. Ñōwoguipogaque quēwēnāni beyæ guiquënë tōmēnāni awënë wængongui bai Tatāna nē cæcā ingampa. Tōmēngā ĩñōmō mänine watapæ mōni apænedō ante pīīnīnque, Nē pōñēnāmaī ĩnāni adāmaī incädänimpa, ante tōmēnāni awinca ñāne cæmonte bai wææ cæcampa.

⁵Mōnitō ĩñōmō, Nāmā incæ waa cæmōnipa, ante tededāmaī ĩmōnipa. Wæætē, Itota Codito incæ mönō Awënë ingampa, ante mōnitō, Tōmēngā beyænque mōnitō mīnitō ĩmīnite nē cæmōni ĩmōnipa, ante mānīnque ante

apænemönipa. ⁶Wëmö iñömö ñäö apäicäimpa, ante Wængonguí incæ badongacäimpa. Adocä ñäö ante në angaingä inte ñöwo wæætë mönitö mímöno tica ënente bai cædinque iïmai ante odömongä amönipa. Tömengä iñömö, Botö æbänö guinæ näwante bai ëmömoo, ante minitö Codito awinca adinque edonque pöní acæminimpa, ante pönö tica ënente bai odömongä amönipa.

**Itota ingante mönö wede
pönëno beyænque quëwëmö**

⁷Nanguí ñäö apäite bai ëwocamöni incæ önoncadedë mante bai edæ ëwocamönipa. Edæ daigænë cængæmoncadenque bai mönitö baö mongæñömönite Wængonguí, Wíi minitö nämä tæi piñænö beyænque ëwocaminipa, wæætë botö tæi piñænö beyænque ëwocaminipa, ante acæðänimpa, ante badongampa. Ìnínque tömengä tæi piñænte pönö badongä æninque mönitö ñäö apäidö möni mänö iñömö önoncadedë mante bai ëwocamönipa. ⁸Mönitö imönite tömänö mämö mö ongonte bai cæðäni wæmöni incæ gueogæ godämaí imönipa. Æbänö cæte quëwëmö imöö, ante wæmöni incæ mönitö guinente wæðämaí imönipa. ⁹Anca togænte pänäni wøyömöni Wængonguí mönitö imönite cöwë ëmö cæte godämaí ingampa. Ayæ wænoncæte ante bæ tadäni incæte æmäwo wænämaí imönipa.

¹⁰Itota tömengä nänö quëwënö pönongä æmöni beyænque mönitö, Baö ayæ mongænte quëwëmöni acæðänimpa, ante cæmönipa. Tömengä nänö wængainö bai mönitö adobai wæætë wæætë wænte bai baö mongæmönipa. ¹¹Mönitö në quëwëmöni iñömönite wadäni wæætë mönitö imönite bæi ongonte æninque, Itota beyænque wæncæminimpa, ante nanguí cæðänipa. Ìnínque mönitö baö ñömænguñö ëñayömönite wadäni, Itota tömengä nänö quëwënö ëñate beyænque ayæ quëwënänpa, ante edonque

acæðänimpa, ante mönitö wæncæ cæte bai ëñate wæmöni. ¹²Ìnínque mönitö möni wænguimämo beyæ ante wøyömöni minitö wæætë mini quëwenguimämo ëñate quëwëminipa.

¹³Docä do apænedinque, Botö në wede pönëmo inte apænetabopa, ante yewæmongacäimpa. Tömengä wede nänö pönengainö bai adobai ëwocadinque mönitö në wede pönëmöni inte adobai apænemönipa. ¹⁴Iïmainö ante ëñëninque wede pönëmöni inte mönitö apænemönipa. Itota ingante, Ñäni ömæmöe, ante në cægaingä adocä mönitö imönite angä ate mönitö Itota tönö godongämæ ñäni ömæmoncæmönimpa, ante do ëñëmönipa. Ayæ minitö tönö mönitö tömämö iñömonte Wængonguí ænte mämö gönongä ate mönö tömengä weca godongämæ gongænguimö imompa. Mänömainö ante do ëñëmöni inte mönitö në wede pönëmöni inte apænemöni imönipa. ¹⁵Wængonguí godömenque nanguí inäni inänite waadete pönö cæcä ate tömënäni wæætë Wængonguí ingante waa ate pönëninque apænecæðänimpa. Ayæ mänömaí pönö cæcä adinque, Wængonguí ñäö apäite bai ëmönongä inte mänömaí cæcampa, ante mönö tömämö watapæ apænecäimpa. Ìnínque, Mänömaí bacäimpa, ante minitö beyæ ante mönitö tömäa edæ cæmönipa.

¹⁶Mänömaí beyæ mönitö, Æbänö cæquimönii, ante wæðämaí imönipa. Edæ iimö iñö iimö iñö mönö baö godömenque wænguñö bai mongæñömö mönö önöwoca wæætë iimö iñö godömenque iimö iñö godömenque miiwoca badonte bai ëwocamompa. ¹⁷Ìñæmpa wænæ wænæ mönö wæwënö incæ wantæ iñö wodëmäa pöní badinque wodæi bai bapa. Incæte mänii mönö wæwënö beyæ mönö godömenque ñäö apäite bai ëwocacäimpa. Ìnínque mönö wæwënö wodæi pöní inte dæ bayö mönö ñäö apäidö mönö ëwocadö wæætë cöwë wodëmäa badämaí ingäimpa. Wæætë mönö watapæ

quëwenguinque godömenque nanguï apâte bai bacäimpa. ¹⁸Inguipogaque mönö quëwënö guiquënë wantä iñö dä gocoopa. Öönädë ñöwo mönö adämaï incoo guiquënë cöwë dä badämaï inte ongongäimpa. Ìnque inguipogaque mönö quëwënö ante mönö adämaï inte bai pönengäimpa. Wæatë öönädë mönö adämaï incoo ante mönö cöwë ate bai pönengäimpa.

5 ¹Oncontai wido cæquintai bai mönö ämontai mongænte quëwëmompä. Ìnque mänintai wido cæmö incæte Wængonguï wæatë, Öönädë miintai mini cöwë owoquintai, ante do mänongacäimpa. Mänintai iñömö waocä öonpoca mänonämaï intai iñonte mönö öönädë æite owoquimö imompä, ante do ëñëmompä. ²Ñöwo iñömö mönö wido cæquintai mongæninque ö ö ante nantate wæwëmompä. Mänömaï beyä mönö öönädë æidinqe mönö owoquintai ëñacæte ante wæmompä. ³Edæ, Baö ömaamö inte wæcæ wæ, ante guïñewocate wædinque mönö, Miintai ëñacäimpa, ante wæmompä. ⁴Mönö iintaique ëñadinqe, Baö ömaamö inte wædämaï incämönimpä, ante guïñewocate wæmompä. Mönö wænguintai mongænte nantate wæmö inte ö ö ante wæmompä. Wængonguï, Minitö ëñate quëwenguintaique, ante yabæque wini caate bai pönongä ëñayömö mönö wængüënëñö edæ dä bacäimpa, ante æncæte ante wæmompä.

⁵Ñöwo ämo ëñëedäni. Wængonguï incæ edæ, Mini miintai wëñate mongænguinqe, ante mönö imonte badongacäimpa. Ayä, Minitö miintai cöwë pönömo æncæminimpä, ante, Näwangä impä, ante odömoncæte ante Wængonguï tömengä Öönöwoca ingante ñöwo da pönongä ämompä. Ìnque tömengä Öönöwoca ingante ænte ëwocadinque mönö, Miintai ëñate mongænguinqe ëwocamompä, ante do ëñëmompä.

⁶Mänömaï beyä mönitö cöwë, Wængonguï cæcæcäimpa, ante wede

pönente tomönipa. Oncönë owote bai iñtaidë mönö quëwenganca mönö Awënë oncönë owodämaï imompä, ante do ëñente wædinque, ⁷mönitö mäninö ante ayä adämaï ëmömöni inte wii möni adinö beyä quëwëmönipa. Wæatë möni wede pönënö beyænque quëwëmönipa. ⁸Ìnque edæ, Wængonguï cöwë cæcæcäimpa, ante wede pönëmöni inte mönitö, Ìntaidë owodämaï inte wæatë mönö Awënë oncönë gote owote waa tobaimpā, ante pönëmönipa. ⁹Ìnque oncönë owote bai tomöni incæ oncönë owodämaï inte bai wämöni incæ mönitö, Mönö Awënë waa tocæcäimpa, ante cædinque cöwë nö cæte quëwëmönipa. ¹⁰Codito tömengä nanö apænte anguimpā gäänë mönö tömämö ponte edæ a ongonguënëmmö imompä. Mönö edæ inguipoga iintai ëñate quëwëninque mönö cædö ante do againgä inte tömengä iñömö apænte ancæcäimpa. Edæ waa cægaimö imö adinqe tömengä mönö imonte edæ eyepæ pöni pædæ pönongä ænguimö imaimompä. Wæatë edæ wënæ wënæ cægaimö imö adinqe tömengä wæatë eyepæ pöni pangä wæbaimompä.

Wængonguï piyänë cædinque, Pödäni, angampä

¹¹Ìnque mönö Awënë ingante guïñente wämöni inte mönitö woadäni inänite godö waadete apænëmönipa. Codito gämænö pöninque watapæ quëwengäimpa, ante pönencädänimpä, ante mönitö godö waadete apænëmönipa. Edæ, Mönitö æbänö ëwocamönii, ante Wængonguï do edonque acampä. Ayä adobai minitö mimö entawëmini inte mönitö ëwocadö ante edonque amini ininque botö waa tobaimpā. ¹²Mänömainö ante apænedinqe mönitö, Waëmö pöni imönipa, ante nämä ante dicæ ämöniyaa. Wæatë iimaï ante apænëmönipa. Pancadäniya iñömö mönitö awincaque adinqe, Pabodoidi æbänö ëwocädänii, ante adämaï inäni inte tömënäni nani adönonque ante pönëninque nämä ængö

cæte bai todänipa. Minitö guiqüenë, Mönitö æbänö ewocamönii, ante do aminitapa. Ìnque tømënanï mönitö ïmönite ante pïinte änäni ëñëninque mïnitö wæætë edæ, Pabodoidi nö ewocadäni inte waa cædäni amönipa, ante wææ apænecæmïnïmpa, ante cæbopa. ¹³Edæ ömæcamöni bai cæmönï incæte Wængongui beyænque ante mänömaï cæmönipa. Wæætë nö pönente cæmönï incæ mïnitö beyæ ante cæmönipa.

¹⁴Ïimainö ante pönente wædinque edæ mänömaï cæmönipa. Tömämö beyæ adocanque wængacäïmpa, ante adinque mönitö, Mönö tømämö do wængamöïmpa, ante edonque ëñëmönipa. Ìnque, Mönö Codito nanguï waadete pönengä inte pönö cæcampa, ante pönëninque mönitö ædö cæte wapiticæ cæquïmönii. ¹⁵Mönö Codito ïñömö tømämö beyæ wæninque, Mïnitö idæwaa nämä beyænque quëwëminïpa, ante wængacäïmpa. Ayæ, Botö në wænte ñäni ömæmongaïmo ïñömote mïnitö botö beyæ ante quëwencæmïnïmpa, ante cædinque tømengä tømämö beyæ wængacäïmpa. ¹⁶Mänömaï ïmpa, ante pönëninque mönitö ñöwo iïncayæ ate waodäni ïnänite adinque, Inguipogaque ëñate quëwënänïpa, ante pönënamäi ïmönipa. Edæ mönö Codito incæ inguipoga ëñate quëwëñongante mönitö mänömainö ante pönengaïmöni incæte mönitö ñöwo wæætë mänömainö ante wïi pönëmönipa. ¹⁷Ìnque Codito nempo æcänö quëwënaa tømengä ingante Wængongui müingä badongä ate müingä bate quëwengampa. Tømengä nänö inguipogaque nänö quëwënimämo edæ dæ gotïmpa. Nöwo wæætë edæ müimämoque ewocacampa.

¹⁸Mäninö botö änö ante tømänö në pönö badongä ïñömö edæ Wængongui adocanque ingampa. Tømengä ïñömö, Mïnitö ëñënamäi cæmïni incæte Codito pönö cæcä beyænque botö piyænë cæcæboïmpa, angampa. Ìnque botö piyænë cæbo adinque mïnitö botö

gämænö pöedäni, angampa. Ayæ mönitö ïmönite pönö angä ëñëninque mönitö wæætë edæ wadäni ïnänite, Wængongui piyænë cædinque, Pöedäni, angampa, ante në cæmöni batamönipa. ¹⁹Ìnque ïïmaï ante apænemönipa. Codito tönö godongämæ cædinque Wængongui ïñömö piyænë cædinque, Inguipoga quëwëminï tømäminï botö gämænö pöedäni, angampa. Pömïni adinque botö, Æpogadö wënæ wënæ cæmïnitawo, ante tee mante adämaï inte pïinämaï incæboïmpa, angampa.

Tømengä mänömaï angä ëñëninque mönitö wæætë mänine ante në waadete apænemöni badinque edæ, Wængongui piyænë cæcä adinque pöedäni, ante apænemönipa. ²⁰Ìnque Wængongui mönitö ïmönite äninque, Mïnitö wæætë botö beyæ wadäni ïnänite waadete apænemïni ëñëninque poncædänïmpa, angä ëñëninque mönitö wæætë Codito beyænque në waadete apænemöni bamönipa. Ìnque mïnitö ïmïnite waadete pönö apænëdinque mönitö, Wængongui gämænö pöedäni, ante Codito beyænque ante apænemönipa. ²¹Wængongui, Mïnitö Codito nö nänö ewocadö ænte ewocacæmïnïmpa, ante pönö cædinque Codito ingante angä ëñëninque tømengä ïñömö edæ wënæ wënæ ewocadämaï inte wæætë edæ mönö beyæ ante në wënæ wënæ cæcä bai badinque mönö wentamö ewocadö incæ mongængacäïmpa. Ìnque mönitö tømengä nempo quëwëninque nö pönï tømengä nänö ewocadö wæætë ænte ewocamompa.

6 ¹Tømengä tönö godongämæ në cæmöni inte mönitö mïnitö ïmïnite ïïmaï ante waadete apænemönipa. Wængongui waadete pönö cæcä æmïni inte mïnitö wïi önonque oda cæcæte ante æncæmïnïmpa, ante nanguï ämöni ëñëmaïmïnïpa. ²Edæ Wængongui do angacäïmpa,

“Mïnitö ïmïnite botö waadete pönö cæyedë mänïñedë mïnitö apænemïni ëñentabopa.

Ayæ, Mïni quëwënguiönæ ïmpa, ante Codito nänö bæi ongote

æñedē botō māniñedē mīnitō beyæ
pōnō cægaboimpa.”

Ante yewæmongatimpa. Ìnrique botō
iīmaī āmo ēñeedāni. Wængonguī
tōmengā nānō waadete pōnō cæyedē do
ba apa quēwēmīni. Codito edæ ængā
beyænque mīni quēwenguīōnæ iñōmō
edæ do batimpa cæmīni.

³Mōnō quēwenguīnō ante adocanque
incæ Wængonguī beyæ mōni apænedō
ante pīināmaī incæcāimpa, ante wææ
cædinque mōnitō iñōmō idiquibæ
cædāmaī iñōnīpa. ⁴Wæætē mīnitō,
Pabodoidi Wængonguī beyæ nē cædāni
inānīpa, ante acæminīpa, ante
odōmoncæte ante mōnitō cōwē iīmaī
cæmōnīpa. Cōwē nantate wæmōni incæ
wænæ wænæ cædāni wæmōni incæ
mō ongonte wææ cædāni wæmōni
incæ æbāmenque wæmōni incæte
mōnitō cōwē wæntæye badāmaī inte
ee cæmōnīpa. Ædō cæte quēwenguīī,
ante wæmōni incæ Wængonguī beyæ
nē cæmōni inte mōnitō godōmenque
cæmōni aedāni. ⁵Ayæ tæi tæi pānāni
wæmōni incæ tee mōnedāni wæmōni
incæ Yæ yæ ante mōnitō iñōnīte
wido cædāni incæte mōnitō wæætē
Wængonguī ingante nē cæmōni inte
edæ nanguī cæmōnīpa. Ayæ woyowotæ
nanguī cædinque mōnitō mōwo mōnāmaī
inte cæmōni incæ cænguī cænāmaī
inte gæwænte wædinque cæmōni incæ
mōnitō godōmenque cæmōni aedāni.

⁶Mānōmaī cædinque mōnitō wentamō
mongænāmaī inte cæmōnīpa. Ayæ
wadāni æbāmenque cædāni incæ mōnitō
nō ēñēmōni inte edæ piyænē cæte
piinte ānāmaī iñōnīpa. Wæætē waadete
cæmōnīpa. Edæ Wængonguī Tæiyæ
Waēmō Ōnōwoca nempo quēwēnīnque
nāwangā waadete pōnēmōnīpa.
⁷Wængonguī nānō tæi pīñænō
ēwocadinque mōnitō Wængonguī nō
nānō angainō ante apænēmōnīpa. Ayæ
tontadoidi guēadō guēa wænōncæte
ante tipæmāa næænāni baī cædinque
mōnitō nō pōnī cæcæte ante Wængonguī
nānō tæi pīñænō ante eyepæ næænte baī
cæmōnīpa.

⁸Mōnitō iñōnīte waa adāni incæ
wiwa adāni incæte mōnitō Wængonguī
beyænque ante cæmōnīpa. Pabodoidi
waa pōnī cædānīpa, ante nō apænedāni
incæ wæætē, Pabodoidi wænæ wænæ
cædānīpa, ante tedewēnāni incæ mōnitō
cōwē godōmenque cæmōnīpa. Pabodoidi
babæ cædānīpa, ante pīnāni incæte
mōnitō nōingā pōnente Wængonguī
beyænque ante cæmōni aedāni. ⁹Edæ
tōmānāni mōnitō iñōnīte do edonque
pōnī adāni incæ adāmaī inte baī
cædinque, Ōnōmīnīque iñīnīpa, ante
tededānīpa. Wænæ cæmōni incæte ee
quēwēmōnīpa. Pānāni wæmōni incæte
mōnitō iñōnīte wænōnāmaī inānīpa.
¹⁰Wæwēmōni incæte mōnitō cōwē
mīmōno watapæ towocamōnīpa. Mōnitō
māincoo ōmæpomōni incæ wadāni
inānīte godō cæmōni ænīnque tōmēnāni
māincoo nanguī pōnī ænte baī eyepæ
pōnī entawēnānīpa. Edæ nē ōmæpomōni
inte wæmōni incæte mōnitō tōmancoo
pōnī entawēmōni inte Wængonguī
ingante nē cæmōni iñōnī aedāni.

¹¹Coodintoidi ēñeedāni. Mīnitō
iñīnīte mōnitō edonque pōnī
apænetamōnīpa. Mīnitō iñīnīte
nanguī pōnī waadete pōnēmōnīpa.
¹²Mōnitō dicæ pæ gompote mīnitō
iñīnīte waadedāmaī iñōnīyaa. Wæætē
edæ tōmēmīni pæ gompodīnque edæ
mōnitō iñōnīte waadedāmaī iñīni inte
wæwēmīnīpa. ¹³Ìnrique botō wēñæmīni
baī iñōmīnīte iīmaī āmopa. Mīnitō
iñīnīte waadete pōnēmōni adīnque
mīnitō næmæ waadete pōnēedāni.

**Wængonguī nē Quēwengā nānō
owocō baī imōmpa, ante**

¹⁴Guēa mangæ mangæ woquīna,
ante wagada tōnō bodo guēa goti
wēmencadāmaī iedāni, ante do
yewæmongatimpa cæmīni. Pōnēnāmaī
ināni tōnō godongāmæ cædāmaī
iedāni. Ìñæmpa nē nō cæcā tōnō guēa
āantawente baī nē ēñēnāmaī cæcā
guiquēnē dicæ adobaī entawengā. Ayæ
ñāō entawengā tōnō guēa gocæte ante
cædinque nē wēmō entawengā iñōmō

mimō nāō entawengampa diyæ guëa goquingää. ¹⁵Codito nānō pönēnō ante edæ wënæ awënë Bediado iñömō edæ adodō ante pönengampa diyæ guëa cæquingää. Nē wede pönengä nānō pönēnō ante nē pönēnāmaï ingä iñömō edæ adobaï pönengampa diyæ adobaï quëwenguingää. ¹⁶Ayæ, Wængongui impa, ante waodäni nāni badöinca æninqe edæ nāwä Wængongui tæiyæ waëmō oncönē ædō cæte mangui cō cæquiï. Mönō guiquenē Wængongui nē Quëwengä nānō tæiyæ waëmō owoquincō bai iñömote tömengä Önöwoca mönonga pō guite owocampa. Ìninqe tömēnāni tönō mönō ædō cæte godongämæ cæquiï. Wængongui incæ, Mänömaï impa, ante ancæte ante iïmaï angacäimpa.

“Waodäni weca owodinqe botō tömēnāni tönō godongämæ cægoncæboimpa.

Botō tömēnāni Wængongui iñömote tömēnāni wæætē botō quinäni incädänimpa,” angacäimpa.

¹⁷Mänömaïnō ante apænedinqe mönō Awënë adobaï ante,

“Wadäni inänite taayænte pöninge nänēnē ponte quëwëdäni, angampa.

Wentamō i adinqe gampodämaï iedäni.

Mänömaï cæmini adinqe botō mīnitō imīnite, Pöedäni, ante ee æncæboimpa.

¹⁸Æninqe, Mīnitō Wæmpobo iñomo inte botō, onguiñæmīni incæ onquiyæmīni incæ, Botō wëmini iminipa, ante æncæboimpa, ante nē Tæï Piñængongä inte Awënë Wængongui angampa.”

Ante Wængongui beyæ yewæmongatimpa.

7 ¹Ìninqe botō nē waademini ëñeedäni. Mönō iñömō, Wængongui, Cöwë cæcæboimpa, ante nānō angaiñō ante do ëñengamöimpa. Ìninqe baonga wentamō mönō ëñadō tönō mimō mönō wentamō entawënō adobaï nā

mënongate bai cædinque edæ mönō tæiyæ waëmō ëwocate quëwengäimpa. Ayæ, Wængongui ingampa, ante guïñente wædinque mönō, Cöwë nō cæte waa quëwengäimpa, ante nanguï cæcäimpa.

Coodintoidi Codito gämænō pönänipa

²Mönitō dicæ wacä ingante wënæ wënæ cæmönīyaa. Wacä wentamō nānō mongænguinque mönitō dicæ wënæ wënæ cæmönīyaa. Dicæ wapiticæ apænedinqe wacä qui ò æmönīyaa. Ìninqe, Pabodoidi mänömaï cædämaï inänipa, ante adinqe mīnitō wæætē mönitō imönite waadete pönēninqe ëñeedäni, ämopa. ³Mänömaïnō ante ämo incæte botō, Mīni pante wæquinque, ante dicæ apænte ämogaa. Edæ botō do antabopa. Mīnitō tönō möni quëwenguinque incæ mīnitō tönō möni wænguinque incæ mönitō mīnitō tönō äanque bai entawente mīnitō imīnite cöwë waadete pönēmönipa, antabopa. ⁴Edæ, Mīnitō nō pönente cæmīni iminipa, ante pönëmopa. Mönitō apænemöni ëñēninqe mīnitō nē waa cæmīni bamīnitapa, ante adinqe botō mönitō apænedō ante nanguï tobopa. Mīnitō mänömaï cæmīni iminipa, ante ëñente wædinque botō gancaë pönëmopa. Ìninqe mönitō wënæ wënæ inte wæwëmöni incæte botō wæætē godömenque watapæ tobopa.

⁵Ìmaï edæ Mäatedöniabæ pöninge cætämönipa. Æmætæ æmætæ gote apænecæte ante cæyömönite wadäni bæ ta bæ ta cædäni wædinque mönitō ædō cæte guëmanguimönii. Edæ nanguï piïnte cædäni wædinque mönitō baonga nantate wædinque önöwoca adobaï guïñente wæwocatämönipa. ⁶Incæte mönitō wæwëñömönite, Nē wæwënäni gancaë bacädänimpa, ante nē pönō cæcä inongä Wængongui iñömō Tito ingante da pönongä pongä adinqe mönitō wæætē gancaë pönentämönipa. ⁷Tömengä ponte a ongongä beyæ gancaë pönēñömönite tömengä, Coodintoidi botō imote waa cædäni adinqe botō

wæætē gancaē pōnentabopa, ante apænecaē ēñente mōnitō godōmenque totamōnīpa. Ayæ botō ïmote ante apænedīnque tōmengā, Bitō ïmite ante nanguī aīnente wædīnque coodintoidi Ca ca wædānīpa. Tōmēnāni ïñōmō, Mōnō ñōwo Pabodo beyæ ante nanguī cæcæīmpa, ante wædānīpa, ante Tito tedecā ēñēnīnque botō godōmenque nanguī totabopa.

⁸Botō doyedē cadota ante yewæmōnīnque da godōmo ænīnque mīnitō wæwente bamīnitawo. Nāwangā botō cadota beyæ wæwente bamīnitapa, ante wædīnque botō, Quīnante mǎnōmaī yewæmōmoī, ante wætabopa. Incæte ayæ ate, Coodintoidi wantæ ïñō wæwēnīnque ñōwo ïñōmō edæ wæwēnāmaī ïnānīpa, ante adīnque botō ñōwo edæ, Nō cædīnque yewæmōmoīmpa, ante piyænē cæbopa. ⁹Edæ mīnitō wæwēmīni beyæ todāmaī ïnīmo inte botō wæætē, Mīni wēnæ wēnæ cædīnō ñīmpo cædīnque mīnitō Codito gāmænō mīni ponguīnque wæwente bamīnitapa, ante adīnque mǎnōmaī beyænque totabopa. Edæ Wængonguī nānō ānōnō mīni ēñēnguīnque wæwente bamīni ïnīnque mōnitō cædō beyæ dicæ wæmīniyaa.

¹⁰Edæ Wængonguī nānō ānōnō ante wæwēmō baī mōnō ocæ ēmænte ponte quēwenguīnque impa. ïnīnque, Quīnante mǎnōmaī wæwēmoī, ante wædāmaī ïmōmpa. Wæætē inguīpoga mōnō quēwenguīmāmo ante wæwēmō baī mōnō wænguīnque impa. ¹¹Edæ Wængonguī nānō ānōnō ante do wæwēnīmīni inte mīnitō ñōwo, Mānīnō mōni wæwēnō beyæ æbānō entawēmōnīi, ante nāmā aedāni. Edæ mǎnōmaī wæwēmīni inte mīnitō, Mōnō ee ongōnāmaī inte cæcæīmpa, ante do cæmīnitapa. Cædīnque, Mōnō pōnencabo wentamō mongænāmaī ïngæīmpa, ante nanguī cædīnque mīnitō nē wēnæ wēnæ cædingā ïngante edæ do pīīmīnitapa. Ayæ, Pabodo æbānō anguīgāā, ante guīñente wæmīni incæte botō ïmote ante aīnente wæmīnitapa. Ayæ, Nē wēnæ

wēnæ cædingā ïngante mōnō nō ante pangæīmpa, ante do cæmīnitapa. Mǎnōmaī eyepæ cædimīni inte mīnitō wentamō mongænāmaī ïmīnīpa, ante edonque abaimpa.

¹²Ïnīnque mīnitō ïmīnite yewæmōnīnque botō nē wēnæ wēnæ cædingā beyæ ante wīi yewæmontabopa. Tōmengā wēnæ wēnæ cæcā wædingā beyæ ante adobaī yewæmōnāmaī intabopa. Wæætē mīnitō Wængonguī ayongā nāmā adīnque, Mōnitō Pabodoidi ïnānīte waadete amōnīpa, ante, Nāwangā ïmpa, ante edonque acæmīnīmpa, ante botō mīnitō beyænque ante yewæmontabopa.

¹³Mīnitō mǎnōmaī cæmīni adīnque mōnitō wēēñēñedē nē wæwēmōni inte ñōwo ïñōmō gancaē pōnēmōnīpa.

Mīnitō waa cæmīni beyæ wēēñēñedē wæwēningā inte Tito adobaī gancaē pōnente ñōwo watapæ pōnengampa, ante adīnque mōnitō do gancaē pōnēmōni inte ñōwo godōmenque nanguī tomōni ïmōnīpa. ¹⁴Botō do ïnōñedē Tito ïngante apænedīnque, Coodintoidi waa cædāni abopa, antabopa. Ñōwo mīnitō waa cæmīni adīnque botō, Tito ïngante botō apænedīnō nō ïmpa, ante adīnque botō guīngo ïmōnāmaī ïmōpa. Edæ botō mīnitō ïmīnite nōinō ante apænetawo. Edæ mīnitō ïmīnite nōinō ante apænebo baī botō Tito ïngante, Coodintoidi waa cædānīpa, ante apænedīnque adobaī nōinō ante apænetabopa. ¹⁵Ayæ Tito ïñōmō, Coodintoidi tōmānāni botō ïmote waa adīnque guīñente wædānitapa. Ayæ, Pōe, ānīnque tōmēnāni botō apænebo ēñēnīnque Ao ante ēñente cædānitapa, ante pōnēnīnque tōmengā mīnitō ïmīnite godōmenque waadete pōnengampa. ¹⁶Ayæ, Mīnitō cōwē waa cæmīni ïmīnīpa, ante pōnēnīnque edæ botō adobaī watapæ tobopa.

Mōnō godōmenque nanguī godongæīmpa, ante

8 ¹Ñōwo botō tōniñadāni apænebo ēñēñedāni. Māatedōniabæ ïñōmō

Codito ingante godongämä nāni pōnencabo wayōmō nāni cabo wayōmō nāni cabo ongōñōnānite Wængongui Ōnōwoca pōnō apānecā ēñēninque tōmēnāni wæætē waadete cædinque iīmaī cædānīpa. ²Nanguī wēnæ wēnæ nantate wæwēnāni incæ tōmēnāni cōwē piyānē cæte watapæ todānīpa. Īnīnque ōmæpodāni incæte tōmēnāni nanguī mānāni baī cædinque, Wængongui quīnāni quī, ante godōmenque todīnque nanguī gomonga godōnānīta.

³Tōmēnāni edæ nāni godonguēnēnō ganca do godōninque ayæ godōmenque nanguī godōnāni adīmo inte botō, Nāwangā impa, ante apānebopa. Ayæ edæ tōmēnāni nāni nāmā pōnēnō baī cædinque, ⁴Wængongui quīnāni beyæ impa, ante mōnitō wadāni tōnō godongämä godoncāmōnīmpa, ante tōmēnāni mōnitō imōnite nanguī ānīnque ancaā ānānīta. ⁵Mōnitō guīquēnē, Māatedōniabæ quēwēnāni tōmēnāni nāni godonte æintaque godonguīnāni īnānīpa, ante edæ pōnentamōnīpa. Incæte tōmēnāni, Wængongui quīmōni imōnīpa, ante edæ Wængongui ingante nāmā godōninque ayæ, Mīnitō imīnite nē cāmōni bacāmōnīmpa, ānīnque mōnitō imōnite edæ adobaī nāmā pōnōnānīta. Ayæ mōnitō pōnēnō ganca adobaī godōninque tōmēnāni nāni godonte æinta ayæ godōmenque godōnānīta.

⁶Māatedōniabæ quēwēnāni mānōmaī cædāni adīnque mōnitō Tito ingante iīmaī antamōnīpa. Bitō doyedē āmi ēñēninque coodintoidi waadete pōnēninque tæcæ godoncæ cædānīta cæbīi. Nōwo wæætē āmi ēñēninque tōmēnāni nē waadete godōnāni badīnque eyepæ godoncædānīmpa, ante mōnitō Tito ingante nanguī antamōnīpa. ⁷Mīnitō iñōmō wede pōnēmīni inte edæ nē waa pōni apānemīni imīnīpa. Ayæ godōmenque gomonga ēñēmīni inte mīnitō, Mōnō cōwē cæcæīmpa, ante nanguī cædōmīni imīnīpa. Ayæ mōnitō imōnite nē waadete pōnēmīni imīnīpa. Mānōmaī tōmānō ante do cædōmīni

inte mīnitō ñōwo adobaī, Wængongui quī, ante mōnō nē waadete godōmō bacæīmpa, ante edæ nanguī cæedāni, āmopa.

⁸Mānōmaīnō ānīnque botō, Cæedāni, ante wææ ānāmaī īmopa. Wæætē, Mīnitō æbānō cāmīnīi, ante ēñencæte ante cædinque botō wadāni nāni nanguī cædīnō ante apānetabopa. Mānōmaīnō ante apānedīnque botō, Mīnitō adobaī tōmēnāni nāni cæbaī nanguī waadete pōnente cāmīnīta, ante acæte ante cædinque, Nē godōmīni baedāni, antabopa. ⁹Mīnitō do ēñēmīnīpa. Mōnō Awēnē Itota Codito oōnædē quēwēninque nanguī gomonga ēnempogaingā inte mōnō imonte waadete pōnēninque iīmaī ante pōnō cægacāīmpa. Botō ōmæpobo babo beyænque mīnitō nanguī wæætē entawencāmīnīmpa, ante cædinque tōmengā edæ mīnitō beyænque ante inguīpoga pōnīnque edæ ōmæpocā bagacāīmpa.

¹⁰Ayæ, Mānīnō mīni godonguīnō ante æbānō cæquēnēmīni imīnīi, ante botō nāmā pōnēninque iīmaī āmopa. Wadepo iñōnedē wadāni godōnāmaī iñōnāni mīnitō iñōmō edæ do tāno godōmīnīta. Mōnō godongæīmpa, ante edæ mīnitō cōwē tāno cæñēmīni imīnīta. ¹¹Īnīnque, Mōnō godongæīmpa, ante quingæ ānimīni inte ñōwo edæ iīnque cæedāni. Mīni ēadīncoo adīnque mīnitō, Eyepæ inte botō pancacooga godoncæboīmpa, ante mīni ānīncoo edæ godōmīni adīnque, Eyepæ godōmīnīpa, ante acæīmpa. ¹²Edæ æcānō godōīnengā tōmengā nānō godonte æinta tōmanta adīnque, Æpotadō botō godonguēnēmo imoo, ante adīnque mānīmpotaque godōninque idæwaa. Godōmenque nanguī mangampa diyæ nanguī godonguingāā.

¹³Mānōmaī ānīnque botō, Wadāni pōnōmenque godōninque guēmāñōnāni mīnitō wæætē mīni eyepote wæquinque godōmenque nanguī godoncāmīnīmpa, ante dicæ āmogaa. ¹⁴Wæætē, Cōwē eyepæ bacæīmpa, ante āmopa. Edæ

mäincoo ñöwo eyepæ mäninque mīnitō nē ænguēnente wædāni inānite godōmīni ænānīpa. Īnīnque iīncayæ ate mīnitō wæætē nē ænguēnēmīni bamīni ate tōmēnāni wæætē eyepæ mante ate mīnitō īmīnite pōnōnāni æñōmīni adopo adopo edæ eyepæ babaiṃpa. Mānōmaīnō ancæte ante āmopa. ¹⁵Edæ do yewæmongatīpa. “Cænguī gomonga wææmpo æningā incæ tōmengā nānō ænguēnenganca ænte bai mānīnque godōmenque mānāmaī ingantapa. Wæætē edæ wædænque wææmpo æningā guīquēnē tōmengā nānō ænguēnenganca eyepæ ænte bai eyepæ mangantapa.” Ante nāni yewæmongaiñō bai iīnque bacæīpa, ante mīnitō īmīnite āmopa.

**Mīnitō weca Titoidi
poncædānīpa, ante**

¹⁶Botō cōwē, Coodintoidi beyæ cæcæīpa, ante mīnitō īmīnite waadete pōnēmopa. Ayæ, Wængonguī pōnō apæñecā ēñēnīnque Tito īñōmō botō pōnēmō bai adobaī pōnente cæcampa, ante adīnque botō wæætē Wængonguī ingante waa ate pōnēnīnque apænebopa. ¹⁷Edæ mōnitō, Coodintoidi weca goe, āmōni ēñēnīnque edæ Tito do Ao ante pongā aedāni. Incæte wīi mōnitō ānīnō beyænque pongampa. Wæætē nāmanque pōinente wædīnque tōmengā nanguī todīnque mīnitō weca pongampa.

¹⁸Ayæ Tito tōnō wacā mōnō tōñīñacā ingante da pōnōmōni pongampa. Īngā Tito tōnō nē pongā īñōmō tōmengā Codito ingantedō ante watapæ mōni apænedō ante nē apæñecā ingampa. Īnīnque Codito ingante godongāmæ nāni pōnencabo wayōmō nāni cabo wayōmō nāni cabo tōmānāni tōmengā ingante waa ate waa apænedānīpa. ¹⁹Codito ingante nāni pōnencabo incæ adocā ingante apænte ænīnque, Pabodoidi tōnō gocæbiīpa, ante da godōnāni ate tōmengā mōnitō tōnō godongāmæ goquīngā ingampa. Edæ mōnitō, Mōnō Awēnē ñāō apāite bai ēmongā ingampa, ante acædānīpa, ante cædīnque ayæ,

Mōnitō wadāni beyæ cæinēmōnīpa, ante acædānīpa, ante cædīnque mīnitō da godonguīncoo ænte goquīmōni imōnīpa. Mānōmaī cæcæte ante goyōmōni, Tōmengā godongāmæ gote cæcæcāīpa, ante da godōnāni gocæcāīpa. ²⁰Edæ wadāni, Pabodoidi babæ cædānīpa, ante ānāmaī incædānīpa, ante wææ cædīnque mōnitō nō pōni cædīnque nanguī pōni mīnitō godonguīncoo ænte godīnque pædæ godoncæmōnīpa. ²¹Edæ, Mōnitō Wængonguī ayongā nō cæmōni inte waodāni ayōnāni adobaī edonque pōni cædīnque nō pōni cæcæīpa, ante cæmōnīpa.

²²Ayæ wacā mōnō tōñīñacā īñongante mōnitō apogamē cōwā ayōmōni tōmengā cōwē tōmāā nō cæcā īnongampa. Ayæ ñöwo tōmengā, Coodintoidi nō cædānīpa, ante pōnengā inte godōmenque waa cædongā ingampa. Mānōmaī ingampa, ante adīnque mōnitō ñöwo tōmengā ingante da godōmōni godīnque tōmengā īñāna tōnō mīnitō weca poncæcāīpa. ²³Tito īñōmō botō tōnō godongāmæ cōwē cæcampa. Īnīnque mīnitō beyæ guēa nē cæmōna imōnāpa. Codito ingante nāni godongāmæ pōnencabo incæ mōnitō tōñīñada Tito tōnō wada īnate da godōnāni godīnque tōmēnāni, Mōnō Codito ingante waa acædānīpa, ante nanguī cæda īnāpa. ²⁴Īnāni inānite apænedīnque mōnitō, Coodintoidi nē waa cædāni inānīpa, ante do apænetamōnīpa. Īnīnque mīnitō eyepæ godōmīni adīnque tōmēnāni, Nāwangā īpa, ante edonque acædānīpa. Ayæ adobaī, Mīnitō waadete pōnō cæmīni adīnque Pabodoidi wæætē mīnitō īmīnite waa adānīpa, ante acædānīpa, ante cæedāni. Mānōmaī cæmīni adīnque Codito ingante godongāmæ nāni pōnencabo wayōmō nāni cabo wayōmō nāni cabo tōmānāni adobaiñō ante edonque acædānīpa.

**Mōnō wædāmaī eyepæ pōni
godongæīpa, ante**

9 ¹Ñöwo mānīnō, Wængonguī quīnāni beyæ mīnitō godoncæmīnīpa, ante botō idæwaa

yewæmōmopa. ²Edæ, Minitō wædāmai inte do cæminipa, ante ēñēninque botō Māatedōniabæ quēwēnāni inānite apānedinque, Acayabæ quēwēnāni iñōmō wadepo inōñedē do godoncæte ante cædōnānimpa, ante do apānetabopa. Apānebo ēñēninque tōmēnāni wodo tōmānāni, Æ Acayabæ quēwēnāni nāni quingæ cæbai mōnō adobaī cæcæimpa, ante cædānipa.

³Incæte botō ñowo mōnō tōniñadāni inānite da godōmo pōninque tōmēnāni mīnitō imīnite apānedāni ēñēninque mīnitō wæætē eyepæ godoncæminimpa. Mānōmai cæmīni ate botō babæ apānedāmai imoi, ante edonque ēñengæimpa. ⁴Iñæmpa Māatedōniabæ quēwēnāni botō tōnō godongāmæ ponte ayōnāni mīnitō wīī eyepæ cæmīni adinque tōmēnāni wæætē, Mīnitō dicæ cæmīniyaa, ante badete tobainānipa. Ayæ mōnitō guiquēnē, Coodintoidi iinque cæcædānimpa, ante nē ānimōni inte odadete guingo imonte wæbaiimōnipa. Mīnitō adobaī, Mōni cæquēnēnō cædāmai imōnipa, ante guingo imonte wæbaiimōnipa. ⁵Iinque mīnitō, Godoncæmōnimpa, ante mīni ānīnō bai eyepæ godoncæminimpa. Ante cædinque botō mōnō tōniñadāni inānite āninque, Mīnitō gote apānemīni ēñēninque coodintoidi ædæmō pōnente cæcædānimpa, ante da pōnōmo pōnāni aedāni. Iinque mīnitō tōnō godongāmæ cædāni ate mīnitō ædæmō pōnēninque, Botō wææ gompodāmai inte waa todinque godōmopa, ante godoncæminimpa.

⁶Iīmai ante pōnēedāni. Wædænque quiyadingā iñōmō amiñaimō wædænque pete æncæcāimpa. Nanguī quiyadingā guiquēnē amiñaimō nanguī pete æncæcāimpa. ⁷Wadāni quī, ante æcānō watapæ todinque godōnaa, ante adinque Wængonguī tōmengā ingante waadete pōngampa. Iinque wadāni wææ ānāmai iñōnāni mīnitō, Botō æpotadō godonguimoo, ante pōnēninque tōmāmīni wædāmai inte mīni ānimpota adopota godōninque do

godonguēnēmīni imīnipa. ⁸Ayæ, Eyepæ pōni ēamīni inte mīnitō quiēmē cæmīni incæ tōmānāni beyæ ante cōwē godō waa cæcæminimpa, ante Wængonguī cæcampa. Iinque, Mīnitō eyepæ ænte ēadinque mānōmai cæcæminimpa, ante tōmengā nanguī cædongā inte cōwē eyede tate bai waadete pōnō cæcā ingampa. ⁹Edæ docā ingante ante iīmai ante yewæmongatimpa.

“Yepanca quiyacā bai inongā inte tōmengā, Ōmæpodāni quī, ante wayōmō wayōmō godongantapa. Iinque tōmengā nō nānō cædinō iñōmō edæ cōwē ewēnāmai ongongæimpa.”

¹⁰Ante yewæmongatimpa. Nē quiyacā ingante Wængonguī, Tōmēmō quiyaquimō, ante eyepæ pōnōninque adobaī, Cænguī, ante tōmāmō imonte eyepæ pōnongā ænte cæmōmpa. Mīnitō iñōmō eyepæ ēamīni inte wacā ingā wacā ingā quiyate bai nēnempocæminimpa, ante cædinque Wængonguī mīni godonganca da pōnōninque godōmenque gomonga da pōnongā æncæminimpa. Mānōmai eyepæ da pōnongā æninque mīnitō wæætē nō cædinque wadāni nanguī ināni inānite nēnempomīni æninque tōmēnāni wæætē amiñaimō tā pete bai watapæ quēwencædānimpa. ¹¹Mīnitō pæ gompodāmai inte wadāni inānite cōwē pædæ godoncæminimpa, ante cædinque mīnitō imīnite Wængonguī nanguī pōni pōnongā æncæminimpa. Æninque mīnitō pæ gompodāmai inte pædæ godō pædæ godō cæmīni adinque mōnitō wæætē, Coodintoidi mānōmai cædānipa, ante tedemōni ēñēninque wadāni wæætē Wængonguī ingante waa ate pōnēninque apānecædānimpa.

¹²Wadāni quī, ante do godōmīni æninque Wængonguī quīnāni tōmēnāni nāni ænguēnēnō ante eyepæ pōni æncædānimpa. Ayæ mīni godōnō æninque tōmēnāni mīmōno eyede tate bai Wængonguī ingante waa ate pōnēninque nanguī apānecædānimpa.

¹³Mōnō Codito ingantedō ante

watapæ ēñēninque mīnitō Ao ante do pōnēmīnitapa. Īnīnque Wængonguī nānō ānōnō ante do ēñēnte cædinque mīnitō, Ōmæpodāni qui, ante pædæ godōmīni ænīnque nē ænāni wæætē Wængonguī ingante, Bitō nāō bai nō pōni cæbi ate coodintoidi bitō ānōnō ante ēñēnte cædānīpa, ante watapæ apænecædānīpa. Ayæ nē ænīnāni inte adodāni godōmenque apænedīnque, Nē ōmæpodāni tōmānāni īnānite da godōnīnque coodintoidi īñōmō mōnitō īmōnite adobai eyepæ pōnōnāni æmōnīpa, ante Wængonguī ingante godōmenque waa ate apænecædānīpa. ¹⁴Ayæ, Coodintoidi īnānite Wængonguī godōmenque nanguī waadete pōnō cæcā beyænque tōmēnāni waa cædāni īnānīpa, ante pōnēnīnque nē ænīnāni īñōmō edæ mīnitō īmīnite waadete pōnēnīnque mīnitō beyæ ante Wængonguī ingante apænecædānīpa.

¹⁵Wængonguī īñōmō godōmenque waa cædinque mōnō Codito ingante da pōnongā ængamōīpa. Īnīnque mōnō, Wængonguī, bitō waa pōni pōnō cægabiīpa, ante mōnitō ædō cæte eyepæ inte waa ate pōnente apænequīmōnīi, ante mōnō Wængonguī ingante apænecæīpa.

Pabodo, Itota nānō nē da godōnīmo īmopa, angampa

10 ¹Mīnitō, Wayōmonque quēwēnīnque Pabodo nanguī pīinte angampa, ante pōnēmīnitawo. Wæætē mōnitō weca pōnīnque awīncadō awīnca adīnque tōmēngā guīñēnete wædinque pæ wēēnecampa, ante pōnēmīnitawo. Īñæmpa mīni ānōmo mānīmotō inte īīmaī āmopa. Codito īñōmō edæ gānē pōnēngā īnongā inte pōnō piyānē cæcantawo. Botō adobai nōwo piyānē cædinque mīnitō īmīnite pōnō waadete apænebopa. ²Pabodoidi īñōmō inguīpogaque ante pōnente cædānīpa, ante pancadānīya odadete ānewēnānīpa. Tōmēnāni īnānite botō guīñēnedāmaī inte nanguī ancæboīpa. Mīnitō guīquēnē adobai odadete āmīni

īnīnque botō mīnitō weca pōnīnque pīinte anguēnēmo īmaīmopa. Īnīnque, Wīi pīinte anguīmo bacæboīpa, ante wææ cæcæte ante botō nōwo mīnitō īmīnite, Ee aquēnē quēwēmīnīi, ante waadete pōnente yewæmōmopa.

³Edæ inguīpoga quēwēmōni incæte mōnitō Wængonguī beyæ ante wæætēdō wæætē cæcæte ante cædinque inguīpogaque quēwēnāni nāni wæætēdō wæætē cæi bai cædāmaī īmōnīpa.

⁴Wæætē edæ mōnitō Wængonguī beyæ ante wæætēdō wæætē cæcæte ante cædinque inguīpogaque quēwēnāni nāni wænōncacquīncoo næænāmaī inte cæmōnīpa. Wæætē Wængonguī tōmēngā nānō tæi pīñæmāmo ænte mīmōno entawēnīnque eyepæ næænte bai badīnque mōnitō tōmēnāni nāni tæi mænōincō bæ tate bai cædinque wæætēdō wæætē nāni godō ānewēnō ante wido cæte bai cæmōnīpa.

⁵Wængonguī ingante pōnēnāmaī ingæīpa, ante nē pōnēwēnāni inte ængæ gantīdīnque tōmēnāni īñōmō, Wadāni tōmānāni adobai Wængonguī ingante pōnēnāmaī incædānīpa, ante cædinque babæ wapiticæ cædānīpa. Mānīi babæ wapiticæ nāni cædōnō ante mōnitō wæætē bæ tate wido cæmōnīpa. Edæ, Codito ingante mōnō ēñēngæīpa, ante nō apænēmōni ēñēnīnque wadāni idīquībæ pōnēwēnāni īñōnāni mōnitō wæætē mānīnō nāni pōnēwēnō tōmānō ō ænte bai wido cæmōnīpa. ⁶Ayæ mīnitō ædæmō nē ēñēnte cæmīni bamīni ate adocanque incæ ēñēnāmaī cæcā adīnque mōnitō wæætē tōmēngā ingante do pangūīmōni īmōnīpa.

⁷Æbānō ī, ante edonque ongō abāīmīnīpa. Pancamīnīya, Botō nāwangā Codito nempo quēwēmo īmopa, ante pōnēmīnitawo. Mīnitō mānōmaī pōnēmīni inte godōmenque īīmaī ante pōnēnguēnēmīni īmīnīpa. Botō Codito nempo quēwēmo īmo bai Pabodoidi adobai Codito nempo quēwēnāni īnānīpa, ante nāwangā īpa, ante pōnēnguēnēmīni īmīnīpa. ⁸Īñæmpa Wængonguī mōnitō īmōnite ānīnque,

Mīnitō nē āmini badinque coodintoidi inānite bæ tate wido cædāmaī incæminīpa. Wæætē ædæmō āmini ēñēninque coodintoidi wæætē oncō tæi mænonte bai gongæncædānīpa, ante cædāni, ante Wængonguī pōnō angā ēñēninque mōnitō nē āmōni batamōnīpa. Īnīnque botō, Nē āmo inte nāmā tocæboīpa, ante tedebo incæte guīñēnedāmaī tedecæboīpa.

⁹Botō, Cadota ante botō yewæmōinta adinque mīnitō guīñente wæcæmīnīpa, ante dicæ āmogaa. ¹⁰Pancamīniya, Pabodo tæi piñænongā bai inte cadota ante yewæmōinque nanguī angā awædō, ante wæmīnīpa. Wæætē edæ adocā incæ mōnitō weca ponte ongōninque edæ aquiī ingā amōnīpa. Tōmengā nānō tedepāmo ōnōmāmoque bai impa, ante pōnēmīni awædō.

¹¹Īñæmpa, Tæi piñæmōni inte cadota ante nē yewæmōmōni incæ mōnitō adomōni inte mīnitō weca ponte ongōninque adobaī tæi piñænte cæcæmōnīpa, āmo ēñēmaīmīnīpa.

¹²Pancadāniya nāmā incæ, Waēmō pōni ĩmopa, ante tededāni incæte tōmēnāni nāmā nāni tede bai mōnitō ædō cæte adobaīnō ante tedequīmōnīi. Tōmēnāni ĩñōmō, Ægancadō waa cæbo eyepæ inguīī, ante nāmā nāni cægancaque ante adinque edæ, Eyepæ cætābopa, ante pōnēwēnānīpa. Tōmēnāni nāni cædō ante, Waa cætawo, ante tee mancæte ante, Do botō cædinō bai adobaī cæbopa, ante adinque, Eyepæ impa, ante pōnēwēnānīpa. Mānōmaī nāmā nāni pōnēwēnonque ante cædinque tōmēnāni ēñēnāmaī inte oda cæte cædānīpa.

¹³Mōnitō guiquēnē, Īngancaque goedāni, ante Wængonguī nāñō angancaque cōwē gomōnīpa. Īnīnque tōmengā, Coodintoidi ganca godinque apæneedāni, angā ēñēninque mōnitō do gote apænedinque, Māningancaque waa cæmōnīpa, ante nāmā waa ate tedemōnīpa. Godōmenque ante tededāmaī ĩmōnīpa. ¹⁴Mīnitō ganca pōnāmaī inte bai mōnitō,

Coodintoidi weca gote do cætāmōnīpa, ante tedemōni bai babæ wapiticæ incædōnīpa. Incæte mīnitō ganca do pōninque Codito ingantedō ante mōnitō watapæ mōni ēñēnō ante apænetāmōnīpa. Īnīnque edæ, Māninganca cætāmōnīpa, ante māninque ante tedemōnīpa. ¹⁵Ayæ wadāni nāni cædinō ante adinque mōnitō, Tōmēmōni cædinō impa, ante ānāmaī ĩmōnīpa. Wæætē mīnitō godōmenque godōmenque wede pōnēñōmīni mōnitō wæætē adodō mīnitō weca ponte quēwēninque godōmenque gomonga cæyōmōni mōnō watapæ bacæīpa, ante pōnēmōnīpa. ¹⁶Ayæ mīnitō weca ĩnīnque cædinque mōnitō godōmenque gomonga godinque mōnō Codito ingantedō ante watapæ mōni ēñēnō ante apæncæmōnīpa, ante pōnēmōnīpa. Mānōmaī cædinque mōnitō wacā nānō cædiñōmō ante, Mōnitō māniñōmō cætāmōnīpa, ante tededāmaī incæmōnīpa.

¹⁷Æcānō, Botō waēmō pōni ĩnōmo inte waa cæbopa, ante toinēna tōmengā wæætē, Mōnō Awēnē waēmō pōni ĩnongā inte pōnō waa cæcampa, ante toquēnengā ingampa. ¹⁸Edæ, Waēmō ĩnōmo ĩmopa, ante nāmā ānongā ingante Wængonguī waa adāmaī ingampa. Wæætē, Īngā waēmō ĩnongā ingampa, ante mōnō Awēnē nānō ānongā ingante ante Wængonguī wæætē waa acampa.

Wængonguī beyæ, ante pancadāniya babæ apænedānīpa

11 ¹Nōwo botō adodeque ōnonque tedete bai yewæmōmo adinque mīnitō ee amīni ĩnīnque botō waa tobaīmopa. Wadō āmo, Mīnitō ee ayōmīni edæ botō ōnonque tedete bai do yewæmōmopa. Īnīnque ĩmaī ante odōmoncæte ante yewæmōmoī aedāni. ²Wængonguī wææ gomocā bai botō adobaī mīnitō beyæ ante wææ gompote āmopa. Mīnitō baquēcā mōnāmaingā bai ĩñōmīnite Codito ængā beyænque mīni pōnencabo tōmengā nempo nō cæte quēwēncæmīnīpa, ante pædæ

godoncæte ante cædinque botō tōmengā adocanque ingante, Bitō quīnāni īnānite æe, antabopa. ³Mīnitō nōingā cædinque wacā miñæ godāmaī inte Codito ingante waadete pōnēmīni incæte botō, Mīnitō oda cæmīni wæcæ wæ, ante guīñente wæbopa. Eba wodi ingante Tæntæbo nanguī ēñengā inte babæ cædinque apænecā ēñēnīnque tōmengā nānō oda cægāi bai mīnitō wīi adobaī oda cæcæmīnīmpa, ante botō wææ ante apænebopa.

⁴Mōnitō, Itota ingante pōnengæīmpa, ante do apænemōni ēñēmīnitapa. Incæte wacā mīnitō weca pōnīnque nāwā Itota ingante apænedāmaī inte, Wacā Itota ingante pōnēedāni, ante babæ apæneyongante mīnitō edæ ēñēē cōmīni awædō. Adobaī Wængonguī Ōnōwoca do ængāimīni īñōmīnite wacā ōnōwoca pō guīyongante mīnitō ee æmīni guicā awædō. Ayæ wadāni mōnō Codito ingante ante apænedāmaī īnāni inte, Wacā ængā beyæ quēwengæīmpa, ante babæ apæneyōnāni mīnitō edæ ēñēē cōmīni awædō. ⁵Mānōmaīnō ante nē tededāni īñōmō nāmā ante pōnēnīnque, Nē gode āmōni inte mōnitō ñænēmōni pōnī īmōnīpa, ante edæ babæ ānewēnānīpa. Tōmēnāni nāwangā ñænēnāni īnāni bai botō dicæ wædāmo īnguēnēmogaa, ante pōnēmopa. ⁶Botō æbānō tedeboo, ante ēñēnīnque mīnitō īñōmō, Ōnōnepāmoque tedecampa, ante pīimīnitawo. Incæte botō ædæmō adīmo inte nē ēñēnīmo inte apænebopa. Pabodo mānōmaī īnongā inte apænecampa, ante acæmīnīmpa, ante mōnitō cōwē mīnitō īmīnite edonque odōmōmōni amīnitapa.

⁷Mīnitō īmīnite ængō cæte bai cæcæte ante botō Wængonguī ingantedō ante watapæ apænebo beyæ ænāmaī intabopa. Mānōmaī ænāmaī inte botō nāmā edæ piinte bai cædinque dicæ wiwa cætābogaa. ⁸Codito ingante godongāmæ nāni pōnencabo wayōmō nāni cabo wayōmō nāni cabo da pōnōnāni ō ænīnque botō mānīntaque godonte ænte quēwēnīnque mīnitō beyæ cætābopa.

⁹Ayæ mīnitō weca ongōnīnque botō quīēmē æīnente wæbo incæ edæ waa atabopa. Wadāni edæ mōnō tōñīnādāni incæ Māatedōniabæ quēwente pōnīnque tōmēnāni botō ænguēnēnō ante eyepæ pōnōnāni æntabopa. Īnīnque coodintoidi botō ānō beyæ wædāmaī incædānīmpa, ante wææ cædinque botō īñōmō edæ, Pōnōmīni æmoedāni, ante cōwē ānāmaī intabopa. Ayæ īncayæ ate cōwē ānāmaī incæboīmpa. ¹⁰Mōnō Codito nō nānō apænedō ante ēñente entwēmō inte āmopa. Botō, Mānōmaī cædinque waa cæbopa, ante cōwē edæ tedeyōmote mīnitō Acayabæ quēwēmīni inte edæ wææ cædāmaī incæmīnīmpa. ¹¹Quīnante mānōmaī ante tedeboī. Mīnitō īmīnite waadedāmaī inte mānōmaī ante tedeboī. Īñæmpa botō æbānō mīnitō īmīnite waadete pōnēmoo, ante do againgā inte Wængonguī tōmengā ancæcāīmpa.

¹²Wadāni guīquēnē, Mōnitō Codito nānō nē godongaīmōni īmōnīpa, ante nē ānāni guīquēnē, Æbānō cæte odōmōmōni īnīnque wadāni Pabodoidi īnānite waa adō bai mōnitō īmōnīte adobaī waa acædānīmpa, ante wædānīpa. Īnīnque botō īñōmō, Īñāni mānōmaīnō ante odōmōnāmaī incædānīmpa, ante mānōmaī tedete wææ cæbo inte edæ cōwē godōmenque wææ cæcæboīmpa. ¹³Tōmēnāni īñōmō edæ, Wadāni oda cæcædānīmpa, ante awēmō cædāni īnānīpa. Mōnō Codito tōmēnāni īnānite da godōnāmaī īngā incæte tōmēnāni īñōmō edæ, Codito nānō da godongaīmōni īmōnīpa, ante babæ apænedānīpa. Ayæ edæ mōnitō Codito nānō da godongaīmōni mōni ēmōnō bai ōnōmoque ēmōnīnque babæ cædānīpa. ¹⁴Mīnitō, Tōmēnāni quīnante wacā bai ēmōnānīi, ante wæmīnitawo. Īñæmpa tōmēnāni awēnē Tatāna incæ babæ cædinque Wængonguī anquedoidi ñāō nāni ēmōnō bai ñāō ēmonte bai ēmongampa. ¹⁵Īnīnque Tatāna beyæ nē cædāni īñōmō tōmēnāni awēnē Tatāna nānō babæ cædō bai adobaī babæ cædinque, Nē nō Cædongā ingante

nē cæmōni imōnīpa, ante ōnōmoque ēmōnānīpa. Inīnque tōmēnāni nē ōnōmoque ēmōnāni inte ōnonque ēwente baquīnānidō anguēnē.

**Æbānō caate wæboo, ante
Pabodo yewæmōngampa**

¹⁶Botō nōwo adodō ante yewæmōmōpa. Mīnitō, Pabodo ocai ōmædæcacā inōngā inte ōnonque tedecampa, āmīnitawo. Mānōmaīnō ante ānāmaī imæwedāni. Incæte wacā ocai ōmædæcacā tedeyōngante mīnitō ee amīni tedecā baī botō adobaī ocai ōmædæcabo inte baī, Nāmā waa cæbo imōpa, ante adodeque tedebō inīnque ee amīni tedebodāni. ¹⁷Botō nōwo mānōmaī nāmā waa ate baī tedete yewæmōnīnque mōnō Awēnē nānō āmaī wīī yewæmōmōpa. Wæætē ocai ōmædæcacā mā nānō pōnente tede baī adobaī ōnonque tedete baī yewæmōmōpa. ¹⁸Pancadāniya nanguī ināni incæ, Mōnitō nāmā waa cæmōnīpa, ante edæ inguīpogaque quēwēnāni tededāni baī adobaī tededānīpa. Tōmēnāni mānōmaī tededāni inīnque botō adobaī, Nāmā waa cæbōpa, ante tedecæboimōpa. ¹⁹Nē ēñēmōni imōnīpa, ante nē amīni inte mīnitō iñōmō ocai ōmædæcadāni ōnonque tedeyōnānite ee ēñē cōmīnīpa tōō. ²⁰Wacā edæ mīnitō imīnite bæi ongongā wædinque mīnitō tōmengā ingante ee nē cæmīni bawēmīni awædō. Wacā babæ wapiticæ cædinque mīnitō quī inguēnē incæ ō ængā incæte mīnitō edæ ee amīnīpa. Wacā mīnitō awēnē baī nāmā ængō cæte angā incæ ee ēñēmīnīpa. Wacā mīnitō imīnite pōnō tamongā incæte mīnitō ee ate wæmīni awædō. ²¹Botō wæætē aquīīmo inte, Tōmēnāni nāni nanguī cædō baī ædō cæte cæquīmoo, ante botō guingo imongūnīnque ōnonque tedebōpa tōō.

Tōmēnāni nāmanque waa adīnque edæ guīñēnāmaī inte tededānitawo. Botō adobaī nāmanque waa adīnque edæ guīñēnāmaī inte tedecæboimōpa. Incæte mānōmaī tededinque botō ōnonque

badete tote baī tedebōpa. ²²Tōmēnāni guīquēnē ebēdeoidi inānitawo, ante pōnēmīni. Botō iñōmō edæ tōmēnāni nāni imāī adobo imōpa. Tōmēnāni idægoidi inānitawo. Edæ botō tōmēnāni nāni imāī adobo imōpa. Tōmēnāni Abadāō wodi pæīnāni inānitawo. Edæ botō tōmēnāni nāni inō baī adobo Abadāō wodi pæīmo imōpa. ²³Mōnō Codito beyæ nē cædōnāni inānīpa, ante pōnēmīni. Botō edæ tōmēnāni nāni imāī inte edæ gomōnga imōpa. Incæte mānōmaīnō ante tededinque botō ocai ōmædæcacā baī inte ōnonque tedebōpa. Tōmēnāni inānite adopoque adopoque wædænque cæyōnāni botō godōmenque nanguī cægaboimōpa. Tōmēnāni inānite wædænque tee mōnedāni wæyōnāni botō imote godōmenque wæætē wæætē tee mōnedāni wægaboimōpa. Tōmēnāni inānite wædænque tæi pānāni wæyōnāni botō imote godōmenque nanguī tæi pānāni wægaboimōpa. Ayæ botō wæætē wæætē wodo wængaboimōpa.

²⁴Oodeoidi æmontaimenca wodo coadenta ganca adoyedē nāni cōwē tæi pæimpoga botō imote adoyedē mānīmpoga tæi tæi pānīnque ōnōmpo æmæmpogoncaque wæætē adopoga adopoga tæi tæi pānāni wægaboimōpa. ²⁵Ayæ cantaca mēmpoga go adopoque botō imote tæi tæi pānāni wægaboimōpa. Ayæ adopoque botō imote dicaca tacadāni wangæ wængaboimōpa. Ayæ wipodē wogaa godīnque mēmpoga go adopoque wipo tente tobæmpo wægaboimōpa. Edæ wīī eyepæ gote botō tōmāā itadē tōmāā woyowotæ tæcæpæno pōni wæwogaboimōpa.

²⁶Wayōmō wayōmō botō anca godīnque wætabōpa. Ōnō æpæmpo wodo bete wæntabōpa. Nē ō ænāni incæ botō guīdēnāni incæ wadāni incæ wodo wænōnāni wæmo adīnque botō wængūnīnque ante wægaboimōpa. Ayæ tōmēnāni nāni quēwēñōmō quēwēnīnque, Ōnōmæca quēwēnīnque, gāwapæno owodīnque botō wængūnīnque ante wægaboimōpa. Ayæ wadāni incæ, Mōnō pōnencabo imōpa, ante babæ

änäni adinque botö iñömö edæ, Babæ cædäni wæncæ wæ, ante wægaboï aedäni. ²⁷Botö pancaönaa tömäå woyowotæ miïmo inte nanguï cædinque wægaboïmpa. Tepæ pancaönaa gæwænte wægaboïmpa. Pancaönaa cænguï dæ ä ate gue ænente wægaboïmpa. Edæ æpogamë pöni cænämaï inte wægaboïmpa. Pancayedëña botö weocoo ömaabo inte yoguite wægaboïmpa.

²⁸Mänömaï wædömo inte botö, Codito ingante godongämæ nani pönencabo tömancabodäniya nani wædö ante æbänö cæquïmoo, ante wædinque iïmö iñö iïmö iñö nanguï cæbopa. ²⁹Edæ wacä aquïngä inte wæcä iñinque botö adobaï aquïïmo inte baï wæbopa. Ayæ, Wënæ wënæ cæe, änäni ëñëninque adocanque oda cæcä ëñente wædinque botö ædö cæte wæwënämaï inguïmoo.

³⁰Iñinque, Nämä täëmö inte cæbopa, ante tededämaï incæboïmpa. Wæætë, Æbänö aquïïmo inte cæbopa, ante acædänimpa, ante botö mäninonque ante tedecæboïmpa. ³¹Wængonguï iñömö mönö Awënë Itota Wæmpocä inongä inte edæ tömengä adocä iñömö Itota Wængonguï ingampa. Tömengä waëmö pöni inongä inte cöwë waa pöni cæcampa, ante mönö tömengä ingante cöwë apænecæïmpa. Tömengä iñömö edæ, Pabodo nö angampa, ante do ëñengampa. ³²Ayæ iïmaï cædäni wægaboïmpa. Adeto Tidiabæ awënë nänö inöñedë mäniñedë botö imote bæi ongoncæte ante cædinque tömengä nänö emiñængä wædænque awënë iñömö iïmaï cæcantapa. Tömengä wadäni inänite angä ëñëninque tömënäni wæætë Daämaco iñömö tömënäni nani wini wææ cæincö boyæ yabædemö gäänë wänö cöñönäni, ³³botö tönö cædäni guiquënë Daämaco nani wini wææ cæincö boyæ cæimpiticæ inö otodë ñä cædete botö imote pædæ wæænönäni ti wææ aamö cæte wodii winongaboïmpa.

Pabodo, Iïmaï wiïmonte
baï atabopa, angampa

12 ¹Önonque tedebö incæte
botö, Waa cætabopa, ante

cöwë tedequënëmo imopa. Iñinque botö ñowo edæ, Wiïmonte baï ayömo mönö awënë mä pöni odömongä atabopa, ante yewæmoncæboïmpa. Ayæ tömengä, Æbänö i, ante edonque pöni nänö odömönönö ante godömenque yewæmoncæ cæbopa. ²Codito nempo në quëwëmo iñömote Wængonguï do catodote wædepo iñonte botö imote öönædë wænömënæcaönæ mäicä æigaboïmpa. Incæte wacä æicä ate baï nämä incæ agaboïmpa. Wabänö önöwoaque inte æigaboï. Iïntai ëñate wabänö inque inte æigaboï, ante botö adämaï imopa. Wængonguinque në ænte mäigaingä inte tömenganque ëñengampa. ³Edæ baö ëñate æibo incæ baö ömaabo inte æibo incæ Wængonguinque ëñëñongä botö, Iïmaï ingatimpa, ante mäninque ëñëmopa. ⁴Wæmönædë tömengä ömä iñömö Wængonguï ænte mäicä æigaboïmpa. Mäniñömö waa pöni apænedäni ëñëmo incæte tömengä, Iñömö möni apænedö ante mini waocabo apænedämaï incæminimpa, ante wææ angä ëñëninque botö waobo inte ædö cæte apænequïmoo.

⁵Iñinque wacä mänömaï öönædë æite ëñengä iñinque botö, Tömengä waa pöni cæcampa, ante do apænebaïmopa. Wæætë nämä botö waa cædönö ante apænedämaï incæboïmpa. Incæte, Tömëmo aquïïmo inte önonque cætabopa, ante mäninonque ante botö nämä waa ate baï apænecæboïmpa. ⁶Waa cægaboïmpa, ante tedebö iñinque botö wiï ocäi ömæcabo inte edæ tedebaïmopa. Iñæmpa näwangä waa cægaiïmo inömo inte botö nö ante edæ tedebaïmopa. Incæte botö wædænque apænete pönömenque cæyömete æcämenque incæ, Pabodo godömenque waa pöni cæcampa, ante änämaï incæcäïmpa, ante wææ cædinque botö waa cægainö ante tededämaï inte edæ pæ wënebopa.

⁷Wængonguï mä nänö odömongainö æbänö waa pöni ingateï, ante wadäni adämaï iñönäni botö adoboque atabopa.

Īninque, Pabodo, Botō adoboque nē agaiṃo ĩmopa, ante nāmā waa adāmaī incæcāimpa, ante wææ cædinque Wængonguī angā ate Tatāna botō ĩmote pōnō da boo codongate ocæ ocæ coingā bai cæcā wætabopa. ⁸Mānōmaī cæcā wædinque botō mempoga go adopoque Wængonguī Awēnē ingante apænedinque, Botō daa cogate bai wæyōmote o tongaate bai cæbi quēwēmoē, ante nanguī ante wætabopa. ⁹Ca wæyōmote mōnō Awēnē wæætē, “Nē aquīī pōnī ĩnāni ĩñōnānīte botō tæī pīñæmāmo eyepæ pōnī pōnōmo æninque tōmēnānique wæætē tæī pīñænte entawencædānīmpa. Īninque bitō nē aquīīmi ĩmi beyænque botō waadete pōnō cædō ĩñōmō edæ eyepæ pōnī ĩmpa.”

Īninque mōnō Codito nānō tæī pīñænte cæpāmo ænte entawencæte ante cædinque botō ĩñōmō edæ, Nāmā aquīīmo inte botō wædinō beyæ ante botō nāmā waa ate tobopa, ante tededinque godōmenque tocæboimpa. ¹⁰Æyedēnō aquīīmo ĩmoī māniñedē edæ tæī ēwocaboimpa. Mānōmaī beyæ aquīīmo inte botō Codito beyænque nanguī tobopa. Badete tote pīinte cædāni wæbo incæte botō piyænē cædinque tobopa. Anca nanguī caate wædinque nangæ babo incæ, togænte pānāni wæbo incæ, Ædō cæte quēwenguīmo, ante wæbo incæ māniñō tōmāā beyæ wædōmo inte botō Codito beyænque ante piyænē cæte nanguī tobopa.

**Coodintoidi æbāmē cædānī,
ante wæbopa, Pabodo angā**

¹¹Ocai ōmædæcacā ingā bai Pabodo ōnonque tedete yewæmongampa, ante pōnēmīnitawo. Īñæmpa tōmēmīni botō beyæ wææ apænedāmaī ĩmīni beyænque botō tōmēmo nāmā wææ cæcæte ante cædinque mānōmaī tedete yewæmōmopa. Wadāni nē gode ānāni guiquēnē nāmā nāni waa acabo ĩnānīpa. Incæte tōmēnāni nāwangā ĩñænānī ĩnāni ĩninque botō ĩñōmō dicæ wædāmo

īmogaa. Īninque mīnitō tōmēmīni, Pabodo waa cæcā ingampa, ante tedequēnēmīni ĩmīnīpa tōō.

¹²Wacā mīnitō weca pōninque æbānō cæcā ate mīnitō, Īngā ĩñōmō mōnō Codito nānō nē da godongaingā ingampa, ante ēñēmīnīi. Īmaī ĩmpa. Tōmengā, Ēñencæmīnīmpa, ante mā pōnī cæcā ate do ēñēmīnīpa. Tōmengā bamōnengæ nanguī odōmongā ate ēñēmīnīpa. Wadāni cædāmaī ĩñōnāni tōmengā tæī pīñænte cæcā ate wædinque mīnitō wæætē edæ, Codito nānō nē da godongaingā ingampa, ante do ēñēmīnīpa. Īninque botō mīnitō weca quēwēninque edæ Codito nānō nē da godongaingā mā cæte nāni odōmōnī bai adobaī odōmōninque edæ wæntædāmaī inte ee cæbo abaīmīnīpa. ¹³Īninque wadāni Codito ingante nāni godongāmæ pōnencabo ĩnānīte waa cædinque botō mīnitō ĩmīnīte dicæ pōnōmenque cætabogaa. Wabānō mīnitō ĩmīnīte, Pōnōmīni æmoedāni, ante ānāmaī inte botō mīnitō ĩmīnīte wīwa cæbopææ.

¹⁴Botō do mīnitō weca mempoga pōnīmo inte nōwo wæætē poncæ cæbopa. Pōninque botō mīnitō māincoo ante ānāmaī incæboimpa. Wæætē, Mīnitō botō wēmīni bacæmīnīmpa, ante cæbopa. Wēñænāni tōmēnāni mæmpoidi beyæ ante dicæ godonguēnēnāni ĩnāniyaa. Wæætē edæ mæmpoidi ĩñōmō wēñænāni beyæ ante nē godonguēnēnāni ĩnānīpa. ¹⁵Īninque, Mīnitō quēwencæmīnīmpa, ante botō māincoo tōmancoo godōninque waa tocæboimpa. Ayæ, Mīnitō quēwencæmīnīmpa, ante cæte wæmo ĩninque waa tobaīmopa. Botō mānōmaī mīnitō ĩmīnīte gomonga waadete pōnēmo ĩninque mīnitō wæætē botō ĩmote pōnōmenque waadete pōnēmīni ĩmīnitawo.

¹⁶Incæte edæ idæwaa āmopa. Mīnitō māincoo ante botō ānāmaī intabopa. Incæte mīnitō, Pabodo nē wēnæ wēnæ pōnengā inte awēmō æncæte ante babæ cæcampa, ante pōnēwēmīni awædō. ¹⁷Wadāni ĩnānīte mīnitō weca

da godöninque botö awëmö äntawo, ante pönëminitawo. ¹⁸Tito ingante, Coodintoidi weca ate pöe, nangui äninque botö wacä mönö töninäcä tönö tömengä tönö da godömo guëa godatapa. Ininque Tito minitö weca pöninque dicæ wiwa cædinque mäincoo ö ängantawogaa. Inämpa tömengä tönö botö guëa äawocaque bai ewocamöna inte mönatö guëa cægömöna adinque minitö adämaï inte bai tedewëmini awädö.

¹⁹Minitö, Pabodoidi nämä wææ cæcæte ante apänedänipa, ante pönëmini awädö. Inämpa mönö Codito nempo quëwënömo inte mönitö Wængongui ayongante apänetamönipa. Edæ, Botö nê waademini imini inte minitö täi piñänte bacëminimpa, ante cædinque mönitö mänömainö ante apänetamönipa. ²⁰Botö inömo edæ minitö waa cëmini acæte ante ponte ayömo minitö wadö cëmini bai botö nangui wæcädömoimpa, ante guifente wæbopa. Ayæ minitö wæætë, Pabodo waa cæcæte ante pongampa, ante pönënömini botö wadö cæbo bai minitö nangui wæcädöminimpa, ante pönente wædinque botö, Mönö mänömaï wädämaï ingäimpa, ante wææ cæcæte ante cæbopa. Edæ minitö wæætëdö wæætë piinte aminitawo. Wacä ingante waa cädäni wædinque minitö godö piinte aminitawo. Inöntobæ ængui baminitawo. Nämänque pönente cëminitawo. Wacä ingante piinque godö babæ ante tedewëminitawo. Godö wëntaa wëntaa äminitawo. Nämä waa adinque cëminitawo. Wii ëñente cædinque minitö Yæ yæ tedeminitawo. Mäninö tömänö wabänö cëminii, ante guifente wædinque botö mänömainö ante edæ yewæmontabopa.

²¹Ininque botö ponte ayömo pancaminiya wëñëñedë mini cægai bai nöwo adobai cëmini adinque botö guingo imonte wæconguëñemo ante awädö. Edæ pancaminiya wëñëñedë wentamö mini mongänö ee mongämmini adinque botö Ca ca wæbaïmopa.

Wëñëñedë mini godö towengainö ayæ towëmini intawo. Wëñëñedë ëñënamai inte mini wiwa cædinö ayæ cëmini intawo. Edæ wentamö mongämmini inte guingo imönämaï imini inte pancaminiya Wængongui gämänö ocæ ëmænte pönämaï iminipa, ante guifente wæbopa.

**Idæwaa mäninque
yewæmömopa, ante**

13 ¹Botö minitö weca mempoga do pongaïmo inte nöwo wæætë poncæ cæbopa. Iïmaï ante do yewæmongatimpa. Nö nö æbänö cætimpä, ante ëñencæte ante waoda mënaa incæ mengäa go adocanque incæ nê adinani inte adodö ante apänedäni ëñëninque do apænte angäimpa, ante nani yewæmongainö ante ëñëninque cæcæboimpa. ²Wëñëñedë wënæ wënæ cædinäni tönö wadäni tömänäni inänite botö minitö weca doyedë pöninque, Ämo ëñëdäni, ante wææ äninque nöwo wæætë wayömo ongöninque adodö ante wææ ante yewæmömopa. Ayæ ate wæætë minitö weca ponte ongöninque tömanga apænte äninque adodäni inänite ata cæpodämaï incæboimpa.

³Pabodo wabänö mönö Codito tönö godongämæ cæte apäñecäa, ante wëminitawo. Mäninö ante mini wädö ante edæ, Näwangä impa, ante odömoncæte ante botö mänömaï apænte ancæboimpa. Mönö Codito incæ botö tönö godongämæ nê cædongä inämaï inte minitö iminite apænte angä abaiminipa. Tömengä inömo nangui täi piñänongä inte minitö weca cæcä apa änewëminii. ⁴Näwangä impa. Mönö Codito adocä incæ aquingä bai inte cæyongante woadäni wæætë ñænquedimæ cæte mäo timpodäni wængacäimpa. Incæte Wængongui nänö täi piñänö beyænque adocä ñäni ömæmonte quëwengampa. Mönitö adobai tömengä nempo quëwëninque aquimöni inte edæ Wængongui nänö täi piñänö beyænque mönö Codito tönö

godongämæ quëwëninque mīnitō beyæ
ante cæquīmōni imōnīpa.

⁵Mīnitō tōmēmīni īñōmō, Æbānō
wede pōnēmo imoo, ante nāmā waa
aedāni. Mīni cædinō adīnque, Æbānō
nōīngā cæbo imoo, ante aedāni. Īñæmpa,
Itota Codito īngante entawēmōmpa,
ante ēñēnāmaī imīnitawo. Wabānō
mīnitō pancamīniya nāmā adīnque,
Botō nōīngā cædāmaīmo īnte edæ
wede pōnēnāmaīmo īnte awædō, ante
ēñēncæte ante aquēnēmīni imīnīpa.

⁶Ayæ nāmā mīni a baī mōnitō imōnite
adobaī apænte adīnque mīnitō,
Pabodoidi guīquēnē nōīngā cædōnāni
īnte nē wede pōnēnāni īnānīpa, ante
edonque amīni waa tobaīmōpa. ⁷Mīnitō
beyæ ante mōnitō Wængonguī īngante
apænedīnque, Coodintoidi cōwē wēnæ
wēnæ cædāmaī incædānīmpa, ante
apænēmōnīpa. Incæte mōnitō, Mīnitō
wēnæ wēnæ cædāmaī imīni ate
wadāni, Pabodoidi ædæmō cædāni
beyænque impa, ante mōnitō imōnite
waa acædānīmpa, ante wīī cæmōnīpa.
Wæætē wadāni, Pabodoidi wīī eyepæ
cædānīpa, ante pīīnte ānāni incæte
mīnitō wæætē nōīngā cæcæmīnīmpa,
ante mōnitō mānīnonque ante cōwē
cæmōnīpa.

⁸Edæ Wængonguī nōīngā nānō ānō
ante nē cæmōni īnte mōnitō adode ante
ædō cæte wīdo cæquīmōnīi. ⁹Īnīnque
mōnitō æyedēmē aquīīmōni īñōmōni
mīnitō wæætē tæī pīñænte cæmīni
adīnque mōnitō nanguī tomōnīpa.
Mīnitō beyæ edæ Wængonguī īngante
apænedīnque mōnitō, Coodintoidi
eyepæ entawëninque picænāni baī nō

cæcædānīmpa, ante apænēmōnīpa.

¹⁰Botō imote apænedīnque Wængonguī,
Bitō wadāni īnānite bæ tadāmaī īnte
tæī mænonte baī pōnō cæcæbīīmpa,
ante pōnō cæcā ate botō tæī pīñæmo
badīnque nē āmo batabōpa. Nē āmo
īmo incæte botō mīnitō weca ponte
ayōmo wīwa cæmīni adīnque pīīnte
panguēnēmo īnāmaī incæboīmpa, ante
wææ cædīnque botō ñōwo wayōmō
quëwëninque, Nāmā apænte aedāni,
ante wææ yewæmōmōpa.

¹¹Īñānāni, mānīnque ante ñōwo
yewæmōmōpa. Mīnitō eyepæ
entawëninque, Mōnō picænāni baī
badīnque nō cæcæīmpa, ante nanguī
cæedāni, āmōpa. Wæntædāmaī īnte
tæī pīñænte cæedāni. Mīni cabo incæ
adoyōmō pōnēnīnque gānē pōnente
quëwëedāni. Wængonguī incæ nē
Waadecā īnte nē gānē entawengā īnte
mīnitō tōnō cōwē quëwencæcāīmpa,
āmōpa. ¹²Mīni cabo incæ godongämæ
pō bee tēnīnque waadete pōnente waa
apæneedāni. ¹³Wængonguī quīnāni
eyequeī quëwëñāni īñōmō, Mīnitō waa
quëwencæmīnīmpa, ante apænedāni
ēñēnte yewæmōmōpa.

¹⁴Mīnitō tōmāmīni mōnō Awënë
Itota Codito waadete nānō pōnō
cægāīnō ante entawencæmīnīmpa,
āmōpa. Mæmpo Wængonguī
tōmengā nānō waadete pōnēnō
ante entawencæmīnīmpa, āmōpa.
Wængonguī Tæiyæ Waēmō Ōnōwoca
tōnō āawocaque baī ēwocadīnque
tōmāmīni godongämæ waa
quëwencæmīnīmpa, ante botō Pabodobo
mānīnque ante yewæmōmōpa.